

DE BELLO  
BOHEMICO  
FERDINANDI II.  
CÆSARIS

AVSPICIIS

FELICITER GESTO  
COMMENTARIUS,

Ex quo seditiosissimum Calvinianæ sectæ ge-  
nium, & præsentem Europæ statum  
licet agnoscere:

AVCTORE


AVBERTO MIRÆO BRUXELLENSI,  
*S. Theologiae Licentiato, Protonotario Apostolico. & Sere-  
nissimæ ISABELLÆ CLARÆ EVGENIÆ,  
Hispaniarum Infanti, à Sacris Oratorij.*

Editio altera auctior & emendatior.



COLONIAE AGRIPPINAE,  
Imprimebat Henricus Krafft.

ANNO M. DC. XXII.







ILLVSTRISSIMO ET REVE-  
rendissimo Domino

D. L V C I O  
SAN=SEVERINO

S. R. E. CARDINALI

ET

ARCHIEPISCOPO SALERNITANO.

**H**Æ R E S I S omnium  
vitiarum mater est ac ia-  
nua : qua nihil pestilen-  
tius, aut magis exitiosum  
Reipublicæ Christianæ  
accidere vnquam potest. Habet ea qui-  
dem pietatis speciem, sed virtutem e-  
ius, si Apostolo credimus, abnegat; fi-  
delitatis præuaricationem gignit; ci-  
uitates, populos, prouincias, regna per-  
fidia suæ contagio maculat, labefa-

2. Tim. 3.

A 2

Stat,



Etat, euertit. Quæ quidem mala omnia  
quàm certò Hæresim comitentur, ne  
præteritorum sæculorum vulnera re-  
fricemus, post *Caluinismi* ortum, GALLIA,  
SCOTIA, BELGICA, GERMANIA, BO-  
HEMIA, MORAVIA, aliæque prouin-  
ciæ, olim sub S. Sedis Apostolicæ ma-  
gisterio florentissimæ, nostra patrum-  
que memoria, suo malo testatum red-  
diderunt.

Vt à GENEVA, illa sentina ac  
Lerna sectariorum, ordiamur, vix eam  
in urbem *Calvinus* pedem intulerat, cū  
& Antistitis & Allobrogum Ducis o-  
mnem dominatum rebellis excussit.  
1535. Id anno superioris sæculi tricesimo  
quinto contigit: quo tempore *Francis-  
cus I.* Galliarum Rex, superatis Alpi-  
bus, *Emanuëli Philiberto*, Sabaudix Duci,  
Augustam Taurinorum, multaq; alia  
oppida eripuit: vnde ingentes paulò  
post bellorum causæ exstiterunt, præ-  
sertim cū *Franciscus Sfortia*, Insubrix  
Princeps, per eos dies sine prole de-  
functus, *Carolus V.* Cæsarem illius pro-  
uinciæ heredem scripsisset. Ita nimi-  
rum truculenta ista secta, qua nulla  
ynquam

vnquam atrocior , aut ad turbas cien-  
das aptior, iam inde à prima infantia,  
diffidijs Principum, caput crescere, &  
lapsu temporis porrò creuit in immē-  
sum. Anno proximè sequenti, *Geneua* 1536.  
sui iam iuris per tyrānidem facta, cum  
vicinis *Bernenfibus*, alijsq; Heluetiorum  
pagis pactum iniit, quod hodieq; per-  
durat; malo certè exemplo , quodque  
aliae postea ciuitates, magno Principū  
damno, sunt æmulatæ, aliae conantur,  
excussio iugo, æmulari.

Ex antro & lacu Lemano pestilens  
Hydra in GALLIAM progressa, regnū  
tot sæculis florentissimum seditioni-  
bus ac bellis tantum non euertit. Sub 1560.  
annum salutis millesimum quingen-  
tesimum sexagesimum, *Hugonotti* (quo  
ominoso nomine Calvinianos Franci  
designant) apud Nannetes in Britan-  
nia Aremorica, haut veriti sunt, per  
effrenem atque inauditam hætenus  
audaciam, impia conferre capita ac  
consilia de regno illo omnium nobi-  
lissimo ad Helueticum regimen effor-  
mando. Nec vna alteraue regni pro-  
uincia ex eo tempore nefandam con-

iurationem suis finibus continere potuit: nobilissimas quasque prouincias & vrbes capere aut tentare placuit. In his *Rotomagus*: quod dum *Antonius Barbonius*, *Nauarræ Rex*, obsidet, ictu sclopi è muro tactus periit.

Princeps *Condaus*, eius frater, qui seditiosis dux erat, auxilijs Germanorum subnixus, ausus & *Lutetiam Parisiorum*, regni caput, obsidere: quæ & perijisset, nisi *Philippus II. Rex Catholicus* Regi Galliarum, leuiro suo, ex Belgica suppetias misisset, quibus *Condaum* ad *Druidum* urbem consecutus commisso prælio superauit, captiuumque abduxit.

*Aurelianum* ad *Ligerim* urbem amoenissimam omitto: quam dum obsidet *Franciscus Dux Guisus*, pro Rege *Vicarius*, *Poltronus* *Guisum*, in traiectu fluminis, sclopo lethali peremit. Autorem facinoris ac suasorem *Theodorum Bezam*, qui intra urbem erat, parricida, post quæstionem tormentis habitam, nominauit: quem *Bezam* constat & de *Catharina Medica*, Regina matre, cum omni prole Regia,

è medio

in medio tollenda non semel consilia agitaſſe.

Vt de priuatorum cædibus nihil dicam, vel ipſi Hugonotti ſuis in libris fatentur, intra vnius anni ſpatium, religioſi ſexus vtriuſque millia viginti quatuor mactata, virgines coniugesque ſupra duodecim millia violatas, templa vicesies mille, monaſteria bis mille, hoſpitalia nonaginta euerſa: denique in decennali illo bello ciuili, biſ millena millia, ſeu duos hominum, omnis dignitatis, ſexus, & ætatis milliones vtriuſque periſſe.

Ex continente in SCOTIAM, Britannię inſulæ partem, tranſeamus. Prouinciam hanc, iam inde à Victoris I. Pontificis Romani temporibus, Chriſti doctrina imbutam, *Ioannes Knoxus*, Caluini diſcipulus, foediffimè primus infecit ac corrupit, ſectæ *Puritanorum* ea in inſula conditor; quos ſulphureo eſſe ingenio, *Iacobus* maioris Britannię Rex dictitare ſolet, MARIA STUARTA Regina, Iacobi mater, ſuo id

malo didicit : quorum quidem tyrannidem verita, cum in Angliam ad *Isabellam* Reginam , patris amitinam , se contulisset , confictis per eosdem criminibus, contra leges omnes diuinas & humanas, in custodiam est tradita:  
 1566. vt ibi demum post annorum viginti carcerem, in arce Frodingia XII. Kalendaras Martij capite plecteretur. De clancularijs ac vetitis coitionibus , de mucronibus eidem *Iacobo* Regi non semel intentatis, de templis ac monasterijs toto regno funditus excisis, dicent alij.

In BELGICAM nostram ex Insula nauigemus. Belgis pro PHILIPPO II. Rege Catholico *Margarita* Parmæ Dux præerat. Ea contempta , *Geusij* ( ne ab Hugonottis & Puritanis vincerentur) vnus Caluini patris vna soboles , anno supra millesimum quingentesimū  
 1566. sexagesimo sexto, motus concitare cæperunt, Diuorum imaginibus *Antuerpia* , *Gandaui* , *Tornaci* , *Valentianis* , in *Geldria* item , *Hollandia* , *Zelandia* , *Frisia* , & alibi è templis, mensè Augusto, deturbatis. Ad arma deinde ventum est : & ne  
 quid



quid ad scelus deesset, annis aliquot 1581. die  
 post, Batavorum, Frisiorum, aliorum. 26. Julij.  
 que populorum fœderatorum Ordines  
 coniurati, PHILIPPVM Regem,  
 ob violatas (vt falsè pangebant  
 & calumniabatur) imperijeges, prin-  
 cipatu excidisse pronuntiant. Quod  
 quidem nefarium decretum hodieq;  
 armis non minùs pertinaciter quàm  
 stolidè tueri conantur.

At verò vnicum istud exemplum  
 suffecerit ad Reges ac Principes cuius-  
 cumq; demum sint religionis, exci-  
 tandos, vt ab isto Calvinianæ scæge-  
 nio sibi caueant, & seposita omni si-  
 multate, sua ac finitimorum Princi-  
 pum iura concordibus animis tuean-  
 tur. Alioquin, quod annis supercri-  
 bus, decretis etiam editis, ausi sunt  
*Bataui*, & nuper *Bohemi*; audebunt & *Hug-  
 notti* in Francia, *Puritani* in Britannia, &  
*Reformati* (vt homines moribus defor-  
 matissimi sese indigetant) in Saxonia  
 nec deerit occasio, nec auctor. Enim-  
 uerò, eo ipso tempore, quo ista com-  
 mentabamur, id ausi sunt *Rupellani* in  
 Gallia: qui indictis contra mandatum

Regium comitijs, nouam in intimis regni visceribus Rempublicam sibi constituissent, nisi LVDOVICVS XIII. Rex Cristianissimus, armis iustissimè contra rebelles sumptis, præuenisset, & acinus occupasset.

Apud FHÆTOS seu GRISONES, rous per *Salicos* Venetorum fautores turbatis, *Suingliani Ioannem*, Episcopum Curiensem, *Rudolphum plantam*, & alios exilio mulctarunt; *Nicolaum Ruscum*, integerrimæ vitæ sacerdotem Sondriensem, dira morte sustulerunt, alios insuper non paucos Catholicos varijs poenis affecerunt. Et verò plures supplicijs afficere aut pellere parabant, nisi *Iacobus Robustellus*, *Ioannes Maria Parauicinus*, & alij nouiles viri Catholici *Vallem-Telinam* occupassent.

Apud BATAVOS Gomaristæ in Arminianos, suos ante socios accomilitones, barbarie plusquam Turcica hodieque sæuiunt.

In GERMANIA, falso Euangelicorum titulo tecti, foedus inter se anno 1607. M. DC. VII. contra Imperij de-

creta inierunt, in comitijs magna arte  
 lites seruerunt, & quibus intra limi-  
 tes Imperij, iuxta veteres leges, ne  
 commorari quidem licebat, ceteris  
 imperare, & veteres inquilinos, Ca-  
 tholicos inquam & Confessionis Au-  
 gustanæ homines pellere, omnia de-  
 mum euertere studuerunt. Ut quæ ni-  
 hil intentatum vel inausum relin-  
 querent, *Fredericum* Comitem Palati-  
 num Rheni, quæ velut Idolum quod-  
 dam suum colebant, ad regium Bo-  
 hemiæ thronum euererunt, corona  
 Imperiali eidem destinata: *Gabrielem*  
 insuper *Bethlenium*, clientem ac vasa-  
 lum Turcicum, ad inuadendam Hun-  
 gariam, excitarunt, & *Vinarienses* Sa-  
 xones, ob rebellionem Electoratu de-  
 turbatos, ad spem recuperandæ digni-  
 tatis euocârunt. Ut verò *Osmannem* Tur-  
 carum Imperatorem sibi obstringe-  
 rent, & copias auxiliares elicerent, *Ste-  
 phano Corlato* Byzantiū misso, confœde-  
 ratorum nomine, eidem *Filecum*, *Novi-  
 gradum*, *Palancam*, *Schatzinum*, aliaque  
 Hungariæ propugnacula obtulerunt.  
 Hæc & alia, aulicos inter luctus,  
 qui-

quibus optimum Principem nostrum  
ALBERTVM, magno orbis Chri-  
stiani damno, nuper defunctum pro-  
secuti sumus, & porrò prosequimur, a-  
nimo versans, istum DE BELLO  
BOHEMICO Commentarium ho-  
ris subcessiuis digessi, quem nunc ad  
Te, ILL.<sup>me</sup> & REV.<sup>me</sup> DOMINE,  
reuerens adfero.

Quòd vt facerem, singularis illa tua  
humanitas, quam coram in vrbe pa-  
tria expertus sum, & placidissimi sua-  
uissimiq̃ue mores, pietas item priuata  
ac publica, quam vniuersa BELGICA  
nostra, cum admiratione spectauit,  
me impulerunt. Celebrant enim ho-  
dieq̃ue eximiam vestram modestiam,  
suauis quadam grauitate temperatam,  
adhæc virtutem, candorem, & integri-  
tatem sacri iuxta ac politici nostratiũ  
ordines.

Neque id sanè mirum videri cui-  
quam debet, vt *fortes creantur fortibus*, à  
nobilissimis profectum maioribus,  
præstantissimam probissimamq̃ue in-  
dolem ac virtutem ab iisdem traxisse.  
Nam quis nescit, maiores olim tuos  
magnam

magnam Calabriae partem, vnà cum Principatu SALERNITANO tenuisse? Quis ignorat hodieque nobilissimum BASINIANI Principatum, ( qui inter regni Neapolitani Grādes, vt loquuntur, est primus ) illustrissimos SAPO-NARIAE, & CLARI-MONTIS Comitatus, aliosque amplissimos titulos ab ILLUSTRISSIMAE ac REVERENDISSIMAE D. VESTRAE nepotibus possideri? Taceo gentis vestrae Cardinales tres laudatissimos, STEPHANVM, FREDERICVM, & ANTONIVM; omitto ROBERTOS, ROGERIVM, VVENCESLAVM, & alios suprema militari praefectura clarissimos; vt qui sciam,


*Et genus & proauos, & quae non feceris ipse,*  
vix tua Te censere. Virtutem, quae sola verè nobilitat, solam prae oculis habes, & probus audire mauis, quàm illustri genere natus. Agnouit id PAVLVS V. Pontifex Maximus, qui Te, post Salernitanum Archiepiscopatum multis lustris laudatissimè rectum, apud sanctissimos Principes nostros ALBERTVM & ISABELLAM CLARAM EVGEMIAM Nuntij Apostolici munere fungivo;

gi voluit; agnouit & GREGORIUS XV. magnus integritatis æstimator, qui Te nihil tale cogitantem, nedum ambientem, initio sui Pontificatus, Romam euocauit, & Vaticano Senatu, adeoque Vrbe & Orbe toto applaudente, sacra purpura donauit. Plura nō addo, ne aut gratiam captare, aut palpare videar: vnum venerans Deum precor, vt plures Ecclesiæ Romanę, adeoque Reip. Christianæ SAN-SEVERINOS largiatur. In quo voto finio, cetera in pectore recondens. Bruxellis postridie Kal. Ianuarias, anno salutis M. DC. XXII.

ILL<sup>m</sup> ac REV<sup>m</sup> D<sup>nis</sup> V<sup>r</sup>  
*deuotissimus cliens*

AVB. MIRAEVS.

DE BEL-



DE BELLO

BOHEMICO

FERDINANDI II. CÆSARIS

A V S P I C I I S

FELICITER GESTO

COMMENTARIUS.



E scæda ac detestanda Rebel-  
lione, quæ bina regna, *Bohemia*  
& *Hungaria*, & quatuor am-  
plissimas prouincias, *Mora-*  
*uiam*, *Silesiam*, *Lusatiam*, & *Au-*  
*striam*, vno velut diluuiο inuoluit, dictu-  
rus, non vtar præambulis, nec vel vllum ad-  
hibiturus sum verborum circuitum. Rem  
ipsam statim aggrediar.

Anno salutis millesimo, sexcentesimo, *Ann. 1618.*  
decimo octauo, dum MATTHIAS Impe-  
rator Viennæ afflictiore valetudine lan-  
guet, & Posonij in comitijs diei indictio, qua *Bohemi re-*  
FERDINANDI, iam tum proclamati ele- *bellant.*  
ctique Regis Hungariæ, coronatio cele-  
branda esset, omnium expectatione diutius  
extrahitur; *Bohemi* coniurati (quorum prin-  
ceps

*Viros tres  
primarios  
è fenestra  
deturbant.*

ceps erat MATTHIAS Comes Turrianus) globo armorum facto, arcem Pragensem, cum armamentario ac curia regia, die 23. Maij occupant, inque condaue (quod Cancellariam vocant) vi irrumpentes, *Guilielmum Slauatam*, Cameræ Bohemicæ Præsidem, *Iaroslauum Borzitam*, regni Mareſcallum, & *Philippum Fabricium*, Secretarium, è fenestra deturbant, altitudine quadraginta amplius cubitorum. Omnes tamen salui atque incolumes, Deo suos protegente, magna omnium admiratione euaserunt.

Bohemis rebellibus postea accessere *Morauum*, *Silesiæ*, *Lusatij*, *Austriaci superiores*, ac demum *Hungari*, GABRIELE BETLENIO Transiluanix Principe, Turcarum cliente ac vasallo, ad spem regni Hungarici euocato. Sed & OSMANES, Turcarum Sultanus, Christiani nominis hostis hereditarius, per legationes est sollicitatus, *Paleso*, *Corlato*, & alijs Constantinopolim missis: oblatumque illi tributum annuum, modò prouinciarum sex confœderatarum protectionem, aduersus FERDINANDVM, fusciperet. Nimirum hic genius sectæ Calvinianæ est proprius ac perpetuus, viam Turcis sternere: quod *Guil. Reginaldus* in suo Caluino-Turcismo abundè docuit, vt de emblemate illo apud Geusios in Belgio, & Hugonottos in Gallia usitato nihil dicam, quo se Turcis potius quàm



quàm Papistis accessuros, non minus stultè  
quàm impiè profiteri solent.

Ceterum Bohemos, aliosque rebelles  
MATTHIAS Cæsar eiusque successor FER-  
DINANDVS, missis primùm legatis ac litte-  
ris, ad obedientiam reducere sunt conati:  
quod cum frustra tentassent, ad apertum  
vtrimque bellum ventum est, magno vni-  
uersæ Europæ motu.

Anno 1619. MATTHIAS Imperator,  
nullarelictæ prole, die 20. Martij Viennæ  
moritur. ALBERTVS Belgarum Princeps, à  
IOANNE SVICHARDO, Archiepiscopo  
Moguntino, & alijs Electoribus delatum  
Imperium, raro & laudabili exemplo, res-  
puit. FERDINANDVS itaque, Caroli Ar-  
chiducis filius, ex Anna, Alberti Bauariæ  
Ducis filia, Matthiæ patrueli suo, à Septem-  
uiris Francofurti congregatis, die S. Augu-  
stini, qui est 28. Augusti, sufficitur. Ei-  
dem prouincias omnes Austriacas, per obi-  
tum Matthiæ fratris ad se deuolutas, idem  
ALBERTVS, inaudita hætenus liberalita-  
te, viuens cessit, in bonum Ecclesiæ ac Rei-  
publicæ Christianæ. Libet hic subnectere  
quæ de XII. Cæsaribus Austriacis nuper scri-  
pli, in gratiam curiosi Lectoris.

*Matthias  
Imp. mo-  
ritur.*

*Ferdinan-  
dus II. suc-  
cedit.*

*XII. Cæ-  
sares Aus-  
triaci.  
Rudol-  
phus I.*

GENS AVSTRIACA velut fato quodam  
ad Imperium orbis terrarum nata, duode-  
cim continua penè serie Cæsares Augustos

B

dedit,

dedit, magno vniuersæ Reip. Christianæ commodo. Primus supremum istud honoris & gloriæ fastigium RVDOLPHVS Habsburgensis apud Heluetios Comes, anno partæ salutis 1273. familiæ suæ intulit, & gentem sceptris regnisque fatalem propagauit. Quo merito? In Dei Opt. Max. consulta inquirere nefas esse scio, nec faciam: sed non est inquisitio, quæ superiorum ætatum historici litteris consignarunt, commemorare.

An. 1261. in modica adhuc fortuna, & non nisi Comes Habsburgensis, multiplex veræ pietatis ac religionis studium RVDOLPHVS prætulit: cui secururam decursu temporum magnitudinem vaticinia vocesque diuinæ adscripserunt. Venatum fortè, die pluuiæ, & vijs fractis ac sordentibus, eques iuerat. Ecce Parochus, SS. Eucharistiam extremum ægro solatium laturus, torrentis ad ripam, pedes occurrit. Quo visio pijsimus Comes, non sine indignatione, equo defilit; & *Me vehi, inquit, Te qui Saluatorē meum portas, pedibus incedere, indecorum sit atque impium. Conscende itaque, & equum hunc cape.* Paret Sacerdos, & præcuntem Comes, capite nudato, piè sequitur, atq; ad humile ægri tugurium deducit,

Sacerdos, ad templum redux equum restituere cū vellet, *Absit, inquit, vt illum ego equum*

*equum conscendam, quem scio Dominum & Creatorem meum gestasse. Quod si præter merita, hæc tibi à me venire censes, teque adeo munere isto indignum, pios in usus conuerte. Illi nempe ego dedi ac dicaui, à quo mihi honores, opes, vita, & anima. Parochus itaque munus admisit, & mente diuinitus monita, Comiti bene abeunti dixit, simulque Imperium orbis terrarum ipsi ac posteris prædixit.*

Postero die RVDOLPHVS ad Farense monasterium (quod inter Tigurū & Aquas situm, Lindemago adiacet) se contulit, virginem sanctimonialem, propinquam & ætate grandem inuisurus. Quæ ybi eū vultu sereno excepisset, *At tibi ego, inquit, hesternò die Numen caeleste placatū beneuolūq; redditum denuntio, proq; pietatis ac liberalitatis officio, tibi posterisq; tuis summū in terris honorē ac fastigiū promitto. Perge porro, atq; vt cæpisti viam insequere.*

Parochus verò postea, cū VVERNERO Moguntino Archiepiscopo, & S.R.I. Electori, à Sacris ac Secretis esset, crebros de RVDOLPHO sermones, non solum apud herum, sed alios quoque Principes habuit, eius virtutes ac pietatem laudibus in cælum efferens. Quo factum, vt agente in primis eodem Electore Moguntino, Imperator anno. 1273. renunciaretur. Sic ferè Franciscus Guillimannus lib. 6. Hist. Habsburgicæ, ex antiquis & probæ notæ codicibus

bus manuscriptis. Alij ad Sueuicam Vatem hæc referunt: quidam & somnio sequentis noctis (qualia non pauca, à Deo immissa, in sacris profanisque historijs legimus) Comitem ipsum diuinitus edoctum scribunt. Vt ut sit, res illa certa est ac rata, & fidem etiam ab euentis (quæ certissima vaticiniorum interpretatio) nunc habet. Itaque nemini mirum videri debet, Calvinianos, sectæ Berengarianæ propugnatores acerrimos, Serenissimam Familiam AVSTRIACAM (quæ ut Deo in primis magnitudinem suam debet acceptam, sic cultus eiusdem, in V. Sacramento, est studiosissima) tanto odio prosequi: quamquam frustra, irritoque semper conatu, Deo scilicet illam protegente.

Ceterum RVDOLPHVS Cæsar creatus, Ottocarum Bohemiæ Regem potentissimum bello vicit; & prouincijs, quas is stante Interregno occuparat, recuperatis, ALBERTO filio suo maiori Austriam, Stiriam, & Carniolam, RVDOLPHO natu minori Sueuiam, & MAINHARDO Tirolensium Principi Carinthiam anno 1282. in comitijs Augustanis contulit. Obijtque plenus gloriæ anno 1291. Spiræ Nemetum conditus. Obseruatum à Gilberto Genebrardo in Chronologia, & alijs, Familiam Austriacam eo ipso tempore orbi Chri-

bi Christiano diuinitus datam, quo Ottomannita publico damno emerfit.

RVDOLPHVM secutus est ALBERTVS *Albertus I.*  
I. filius, qui Adolphum Nassauium, prælio victum, regno exuit, obiitque anno 1308. Spiræ itidem sepultus.

FREDERICVS cognomento PVLCHER, *Fredericus Pulcher.*  
Rudolphi nepos, Rex Romanorum, eo nomine Tertius, anno 1314. eligitur, & a Ioanne XXII. Papa confirmatur. Cum LVDOVICO IV. Bauaro collega an. 1325. transiit, ut pari uterque potestate imperaret. Obijt anno 1330. conditus in Carthusia Marbacensi à se condita, apud Viennam Austriæ.

Succenturiati deinde Luceburgici; quos ALBERTVS II. Sigismundi Imperatoris gener, excepit: cui, intra vnus anni spatium, tria regna, Bohemiæ, Hungariæ, & Romanorum, rara quadam felicitate, obtigerunt. Viuere desiit an. 1439. Albæ in Hungaria.

Exinde sobrinus illius FRÉDERICVS *Fredericus IV.*  
cognomine LONGÆVVS sceptrum tenuit; quo nullus Cæsarum, post Octavianum Augustum, diutius imperauit, quique postremus ex Germanicis Imperatoribus in vrbe Roma coronam Imperij accepit. Obijt anno Christi 1493. Imperij 53. ætatis. 78.

Reliquit is filium MAXIMILIANVM co-

*Maximi-  
lianus I.*

nomine Primum, qui potentiam istam, toti hodie orbi formidabilem, in Austriam gentem transtulit, *Maria Burgundica*, Caroli Audacis filiae, matrimonio auctus. Dignus profectò ea fortuna Princeps, utpote virtutibus, & animi magnitudine, itemque benignitate, cum optimis quibusque omnium sæculorum Principibus comparandus. Is filium reliquit *Philippum* cognomento *Pulchrum*, cui *Ioanna* vxor, Ferdinandi Regis Catholici filia, Hispaniam, cum India, dotalem attulit. Vita excessit Maximilianus an. 1519.

*Carolus V.*

MAXIMILIANO in Imperio successus est ex Philippo filio nepos CAROLVS V. vero elogio Maximus, cuius laudes leuiter hic libasse, sit detraxisse.

*Ferdinandus I.*

*Max. II.*

*Rudol-*

*phus II.*

*Ferdinandus II.*

Carolus porrò FERDINANDVM fratrem, Ferdinandus filium MAXIMILIANVM, eo nomine Secundum, Maximilianus RVDOLPHVM II. itidem filium, Rudolphus MATTHIAM fratrem habuit successorem. Patrueli suo, Viennæ an. 1619. die 20. Martij defuncto, successit FERDINANDVS II. Cæsar, à Septemuiris Francosurti congregatis, die 25. Augusti, electus. Cui prouincias omnes Austriacas, per MATTHIAE fratris obitum ad se deuolutas, ut dixi, cessit ALBERTVS, Belgarum Princeps; raro sanè ac laudabili exemplo, si vniuersæ

uerſæ Reipublicæ Chriſtianæ bonum ſpectemus, vt is ſpectauit.

Optimo itaq; iure DOMVS AVSTRIACA ROMANORVM IMPERATORVM (quos nouem continua ſerie dedit, & plures, vt vo- uemus, dabit) PARENS AC NVTRIX, fren- dente nequidquam inuidia nuncupatur.

*Hic priſcæ PIETATIS bonos. Nec terminus vnquam*

AVSTRIACAE ditiois erit, quã Sueuica Vates, Fatidicaque pius firmavit voce Sacerdos.

Haut abs re fuerit his ſubiūgere Prognō- ſticō, quod Ioānes Ranzouius, natione Danus, in libro ſuo Coloniae 1585. edito cōmemorat.

Friderici II. Imperatoris Aſtologus, ab eo in- terrogatus, cur tantum honoris Rudolpho Habſ- purgenſi Comiti pauperi, in aula ſua tunc verſan- ti, exhiberet; reſpondit: Mortuis tuis filijs, quo- rum adhuc decem ſuperſunt, ipſe & poſteri eius ad tua regna peruenient. Nam anno Chri- ſti 1273. Kalendis Octobris, RVDOLPHVS à Germanis Principibus Francofurti, in Regem Romanum eligitur, cum Baſileã obſideret. Et hodi- erno adhuc die videmus RVDOLPHI poſteros re- gnum Neapolitanum, & Ducatū Austria & Sue- uia, vna cum Imperio & regno Neapolitano, obti- nere. Modernus enim Imperator ab eo ditiones hæ- reditatis iure accepit, & Philippus Hispania Rex ex eodem natus, regnum Siculum & Neapolita- num nactus eſt. Hactenus Ranzouius.

*Prognōſti-  
con de gente  
Aſtriaca.*

*Bohemi  
Ferdinan-  
dum II. ab-  
dicant.*

*Palatinus à  
rebellibus  
eligitur Rex  
Bohemia.*

Post MATTHIAE porrò Cæsaris obitum, Bohemi rebelles, dum suauem ac moderatum gētis Austriacæ dominatum prorsus excutere conantur, FERDINANDVM, legitimum Regem suum ann. 1617. iuratum ac coronatum, per summam iniuriam atque audaciam abdicant, libellis plurimis in facti defensionem euulgatis. Causa abdicationis potissima à iure electionis liberæ petita est, quod inscitè sibi factiosi arrogare sunt conati. Culpa item comitiorum regni integritas, in quibus FERDINANDVS publicè susceptus fuerat. Regem itaque nouum sibi quærentes, cùm à IOANNE GEORGIO, Electore Saxoniae, & MAXIMILIANO Bauiariæ Duce, quibus regni coronam detulerant, reiecti essent, FREDERICVM V. Comitem Palatinum Rheni, die 27. Augusti, Pragæ congregati, sibi Regem elegerunt, & die 4. Nouembris coronarunt.

Mox ad arma vtrimque fortiter ventum est, & tota pænè Europa in partes tracta. Protestantes seu Euangelici ( vt sese vulgò nuncupant ) Germaniæ Principes confœderati ( quos inter eminebant, IOANNES FREDERICVS, Dux VVirtembergæ, MAVRITIVS Landt-gravius Halsiæ, CHRISTIANVS Princeps Anhaltinus, IOACHIMVS ERNESTVS, Marchio Anspacensis, & GEORGIUS FREDERICVS, Marchio



chio Durlacēsis) Palatini partibus, vnā cum  
*Britannis, Batavis, & Ciuitatibus aliquot Im-*  
*perialibus,* sese adiunxerunt. SAXO & BA-  
 VARVS in fide, Cæsari & Imperio debita,  
 magno Reipublicæ Christianæ bono, per-  
 stiterunt. Saxonem iniuria propriumq; pe-  
 riculum stimulabat, quod Vinariensibus, ex  
*Ioannis Frederici,* per CAROLVM V. Ele-  
 ctoratus titulo priuati, stirpe prognatis, Ba-  
 tauis, & alij per Germaniam Caluiniani, spem  
 fecissent recuperandæ dignitatis. ALBER-  
 TVS Belgarum Princeps primò CARO-  
 LVM LONGEVALLVM, Comitem Bu-  
 quoium, fortissimum belli Ducem, postea  
 bis mille equites, & peditum sex millia in  
 Bohemiam misit. Nec defuere sororio suo  
 SIGISMVNDVS Poloniae Rex, & COSMVS  
 Magnus Etruriæ Dux: quorum prior *Cosa-*  
*corum* equitum millia quatuor oportunè  
 transmisit. PAVLVS V. Pontifex magnam  
 pecuniæ vim, ex Italiae decimis Ecclesiasti-  
 cis collectam suppeditauit. Cumq; bellum  
 traheretur, & rebellio, vt fieri solet, lapsu  
 temporis incrementum fumeret, PHILIP-  
 PVS III. Rex Catholicus, ne periclitanti  
 Ecclesiæ aut genti suæ deesse videretur, præ-  
 ter vndecim armatorum millia, quæ in Au-  
 stria alebat, copiosissimum apud Belgas ex-  
 ercitus, ad inuadendum Palatinatum, vi-  
 resq; hostium distrahendas, conscribi iussit.

B 5

Mense

*Comes Bu-*  
*quoius in*  
*Bohemiam*  
*mittitur.*

*Mansfeldius cum suis à Buquoio cecidit.*

Mense Iunio antequam auxiliares è Belgio copix ad castra Buquoiana aduenissent, *Ernestus Mansfeldius* cum suis in Bohemia à Buquoio vincitur ac fugatur, mille ampliùs hostibus cæsis. Fuit ea victoria sanè peropportuna, ad FERDINANDI II. Cæsaris electionem accelerandam, & ad *Matthæum Comitem Turrianum* à Viennæ obsidione reuocandum.

Idem Buquoius, initio mensis Nouembris, mille circiter Húngaros, qui Danubium transmiserant, in prælio occidit, reliquis bis mille fugatis.

*Arminianorum & Gomaristarum factiones.*

Caluiniana porrò Hæresis, qua nulla unquam crudelior aut pestilētior exstitit, non contenta Catholicorum cædibus, nec eorum sanguine per Bohemiam vicinasque prouincias satiata, hoc ipso anno per Bataviā in sua quoque membra, in *Arminianos* inquam, seu *Remonstrantes* atrocissimè sæuijt. Cœpit hoc bellum, anno circiter millesimo sexcentesimo quarto, scholam primò Leidensem turbare, thesibus contrarijs de prædestinatione, Gratia, Libero arbitrio, alijsque fidei capitibus, per IACOBVM ARMINIVM, & FRANCISCVM GOMARVM, Pseudo-Theologiæ Caluinisticæ ea in vrbe Professores, vtrunque propositis: quod postea Rempublicam grauiter afflixit, & vniuersas Belgij pro-

prouincias confœderatas mirificè turbauit.

Ante omnia , diu multumq; inter partes disceptatum fuit , an *Catechismus Heidelbergensis*, & *Confessio Belgica Ecclesiæ reformatæ*, vt vocant, recenseri ac corrigi deberent : quod vt fieret , *Arminiani* , Ordinum seu Statuum fauore suffulti, anno 1606. in Pseudo-Synodo Gorcomiana obtinuerunt. Durū id *Comaristis* videbatur, vtpote qui scirent dictam *Confessionem Belgicam* , ab illa sua reformatâ scilicet Ecclesiâ iam olim approbatam esse, & eo loco habitam , vt non de ipsa , sed ex ipsa & secundum ipsam esset iudicandum. Ex quo consequi videbant , si Catechismus & Confessio ista recenserentur ac corrigerentur, Ecclesiâ suam non esse iam reformatam, vt stolidè prætendunt sed reformandâ.

Hinc enata postmodū illa inter partes odia , quæ , *Comaristis* per arma præualentibus, *Barneuelgium* postea carnificis manu sustulerunt, *Hogerbetium* & *Grotium* ad perpetuos carceres damnarunt, & centū amplius Ministros seu Prædicantes Arminianos in exilium abegerunt. Iusto sanè Dei iudicio, vt qui à vera veterique Ecclesiâ, & naturali suo Principe recesserant , à suis ipsi socijs ac consortibus plecterentur.

Animis itaque hinc inde mirum in modum exacerbatis, odijsque crescentibus, anno 1617. *Harlemum* , *Leida* , *Roterodamum* ,  
*Gauda*,

*Gauda, Horna, & aliæ factionis Arminianæ ciuitates Hollandicæ, fœdus inter se ineunt, & militem conscribunt, ad vim à ceruicibus suis arcendam, suaq; aduersus furiosos Gomaristarum impetus tutanda. Idem postea *Vltraiectini*, & alij fecere; magno quidem conatu, sed non ea constantia ac fortitudine qua conueniebat, si salui esse vellent. Anno namque proximè sequenti, *Vltraiectinis*, per MAVRITIVM Principem Arausionensem, in ordinem redactis, & arma ponere iussis, *Ioannes Barneuelius*, Hollandiæ Ad-uocatus, vt nuncupant, alter veluti Cato hætenus à Batauis habitus, *Ægidius Ledenbergius*, *Vltraiectinorum* in reb. politicis moderator, *Rumoldus Hogerbetius* Leidenfis, & *Hugo Grotius*, Roterodamensis Syndicus, primaria Arminianorum capita, die 28. Augusti in Haga-Comitis, iussu eiusdem Mauritiij capiuntur, & strictissimæ custodiæ mācipantur. Audax facinus, nec Caluinianis insolens, quodque Gomaristis feliciter cessit. Paulò enim post Arminiani passim omnes ex magistratibus, publicisque functionibus, contra omnia iura ac priuilegia prouinciæ, hætenus contra Hispanos adeò decantata, sunt exturbati: *Ioannes Vtenbogardus*, aulicus apud Hagenses Prædicans, *Iacobus Taurinus*, *Vltraiectinorum* primarius Minister, *Petrus Bertius*, Professor Leidenfis, & alij*

Præ-

*Barneuelius, Grotius & alij capiuntur.*

*Arminiani à magistratibus pelluntur.*

Prædicantes Arminiani, subita illa rerum mutatione metuque perculsi, in Brabātiā, Galliam, ac Germaniam diffugerunt. Ex his *Taurinus*, Bilancis & aliorum libellorum contra Gomaristas auctor, altero post fugam mēse, in villa suburbana apud Antuerpiam, pusillanimitate periit. *Bertius*, animo grandior ac fortior, Parisios abiit, & biennio post ad Catholicorum castra transiit.

Hoc ipso anno, die 15. Nouembris, *Dordraci*, Hollandiæ oppido vetustissimo, *Pseudo-Synodus* à Calvinianis contra Arminianos est inchoata: eodemque tempore *COMETA*, malorum Reipublicæ Christianæ imminentium nuntius, in orbe nostro spectari cæpit, omnium sermonibus, multorum scriptis celebratus. *Dordracenis* decretis per legatos suos subscripserunt *Geneuenses*, *Heidelbergenſes*, *Marpurgenses*, *Bremenses*, *Embdani*, *Nassouiani*, *Tigurini*, *Bernenſes*, *Basileenses*, *Schafhusiani*, & *Georgius Landanenſis in Anglia Pseudo-Episcopus*: ex quibus tamen plerique, si non omnes, domi collegas habent aliter sentientes. O discordem & Nouatoribus dignam concordiam!

Prætensam Synodum hanc scriptis suis mirum in modum præter Catholicos, Arminiani & Lutherani exagitarunt. De capitibus porrò inter Arminianos & Gomaristas controuersis quid sentiendum, eruditè docuit

*Pseudo-Synodus Dordracena inchoatur.*

docuit IOANNES MALDERVS, Episcopus  
noster Antuerpiensis, in suis Anti-Synodi-  
cis, per Plantinianos an. 1620. editis.

*Finitur an.  
1619. die 6.  
Maij.*

*Barneuel-  
tius decapi-  
tatur.*

Vt porrò decreta sua Patres illi Conscri-  
pti, mitissimi scilicet ingenij homines, san-  
guine consignarent, paucis post finitam  
Pleudo-Synodum dictis, in BARNEVEL-  
TIVM, quem Belgicæ prouinciæ confede-  
ratæ suum veluti Lycurgum hætenus co-  
luerant, capitalis sententia fertur: & con-  
tempta LVDOVICI XIII. Galliæ Regis,  
per Legatum suum Hagæ residentem, inter-  
cessione, miser die 13. Maij publicè, in area  
palatij Hagensis, infami carnificis manu de-  
collatur; grata Hispanis victima, quos capi-  
tali odio fuerat profectus. Eo enim nomi-  
ne plurimùm Gomaristis profectò debe-  
mus, quòd acerrimum ac prudentissimum  
Catholici Regis hostem, de propensione er-  
ga illum falsò accusatum, suis ipsi manibus  
è medio sustulerint.

*Ledenbergij  
cadauer  
suspendi-  
tur.*

*Hogerbe-  
tius & Gro-  
tius ad per-  
petuos car-  
ceres dam-  
nantur.*

Exinde cadauer LEDENBERGII, qui si-  
bi ipsi in carcere vim intulisse dicebatur,  
nouo atque inaudito antea exemplo, sale  
conditum, loculoque inclusum, ex furca sus-  
penditur. HGERBETIVS & GROTIVS  
ad perpetuos carceres damnantur, CORNE-  
LIVS MILIVS, Barneueltij gener, in obscu-  
ri nominis insulam Zelandicam ablegatur:  
HANIVS Harlemensis Syndicus, Adolphus VVa-  
lius,

lius, & alij primarij in Republica viri pro-  
scribuntur. *Vtenbogardus, Greenwichius, Vor-*  
*stius, Episcopus*, & alij amplius centum Mini-  
stri exilio mulctantur: deniq; nobiles ac ci-  
ues Arminiani omnes publicis muneribus,  
nullo iuris ordine seruato, priuantur. O exi-  
miam Calvinianorū in suos benignitatem!  
à quibus caueant sibi, si sapiunt, non modò  
*Catholici*, sed etiam *Lutherani, Hussitæ, Anaba-*  
*pistæ*, & alij cuiuscumque professionis.

*Plurimū  
proscribun-  
tur.*

*Felix, quem faciunt aliena pericula cautum.*

Sed lacertos etiamnum mouent, & porrò  
moueunt Arminiani, vtpote non causā,  
sed ciuili ac militari potentia victi.

Ex captiuis supra memoratis, GROTIUS  
quem Ordines confederati, post cædē Bar-  
neueltij, arci Louensteniæ, cū *Hogerbetio*,  
incluserant, miro quodam commento seu  
stratagemate, per excubias & custodias ini-  
micas, in arcē seu custodia vectoria ab ipsis  
custodibus suis, sed ignaris, ex hostili custo-  
dia, & pænali carcere elatus, an. 1621. die 22.  
Martij liber euasit, ac biduo post saluus An-  
tuerpiam peruenit, indeq; Lutetiam se con-  
tulit; Arminianis passim applaudentibus,  
Gomaristis verò nequidquam freudentibus  
atq; indignantibus. Super qua mira libera-  
tione exstat ingeniosus Lusus poeticus col-  
legæ nostri IOANNIS HEMELARII, Cano-  
nici Antuerpiensis, typis nuper Plantinianis  
editus.

*Grotius ci-  
sta effertur  
è carcere.*

Anna

*Pauli V. decretum de  
decimis.*

Anno M. DC. XX. PAVLVS Papa V. Idibus Ianuarijs publicat litteras Indictio- nis sex decimarum ( vt habet diploma ) super fructibus ac pensionibus Ecclesiasticis Italiae, in subsidium FERDINANDI Cæsaris contra Bohemos & alios rebelles.

*Herbipoli  
& Mulhu-  
sa comitia.*

Februario mense habita sunt à nostris comitia *Herbipoli* in Franconia, dein *Milhusij* seu *Mulhusa* in Thuringia : quibus posterio- ribus, præter Electores Ecclesiasticos, & SAXO, cum LVDOVICO, Landt-Grauo Darmstadiensi, interfuit. Actum in ijs de communi contra Caluinistas fœdere, qui vniuersum Imperij ordinem euertere, Germaniam Turcicæ seruituti subdere, antiquâ Catholicorum Religionem, & Augustanam Confessionem non occultis cuniculis, vt hæctenus, sed aperto Marte profligare conarentur.

Comes BUQUOIVS interea Bohemos & Austriacos rebelles à Vienna arcebat, die II. Februarij præclara *Longolusii* victoria potitus, & altera, eaq; palmari, in Dominica Palmarum. In quo posteriore prælio, equus eius quinque vulneribus est confectus. Vt autem exercitui hostili admodum numero- so Buquoius impar non esset, submissæ sunt ex Italia, iussu PHILIPPI III. Regis Catholici, binæ veteranorum militum legiones, vna Belgarum seu VVallonum, sub

CVI-



GVILIELMO VERDVGO, altera Neapolitanorum, sub CAROLO SPINELLO: quibus duabus legionibus, vnà cum Buquoiana pariter Belgarum, Pragensis victoriæ, hoc ipso anno mense Nouembri obtentæ, laus magna ex parte debetur.

Menſe Iunio MAXIMILIANVS Bauariæ Dux, exercitus Catholici ductor, adnitenſibus Gallis ad Cæſarem Oratorib. per *Pax Vlinenſis.* id tempus Vlmæ hoſpitantibus, cum fœderatis Principibus Proteſtantibus, qui caſtra ad Vlmam habebāt, pacem fecit, vt Auſtriæ ac Bohemiæ rebelli bellum inferret, & Buquoio laborātī tempeſtiuè ſuccurreret. Compoſitis igitur Germaniæ reb. copias partim Danubio, partim terra *Paſſanum* abduxit, & Oratoribus *Lincium* ad Ordines miſſis, mādāta, quæ à Cæſare habuit, expoſuit, Auſtriæque ſuperiorem mox ingreſſus, rebelles adſcitæ veſaniæ ſupremū admonuit, quietis amicus, hoſtis hoſtib. futurus. Itaq; reiectis primū lymphatis ruſticorum turmis, qui cæſis ſiluis vias interſeſerant, & aditu Bauarum arcere conabantur, arces aliquot, quæ progredientibus armatis obſiſtere audebāt, ſunt expugnata. Quarto die Auguſti *Linciū*, *Lincium occupat Ba-* oppidum prouincię primariū, Dux ingreſſus eſt, & intra dies paucos *Auſtriam*, quā cis *harna.* Anaſum eſt, vniuerſam occupauit, dominoque ſuo Cæſari vindicauit. Magiſtratu uere;

tere; quem factiosi sibi crearent, abdicato nouoque creato, in *Austriam inferiorem* copiarum partem misit: quæ *Buquoio* ad hostium castra excubanti, sed militum numero impari, se iungentes, Bohemum hostem, multitudine ferocem, finibus eiecerunt.

*Vallis Tellina defectio à Grisonibus.*

Dum hæc in Germania Austriaque geruntur, *VALLIS TELLINAE* incolæ Catholici apud Rhætos seu Grifones, mense Iulio, iugum Calvinisticum excutiunt, duce *IACOBO ROBUSTELLO*, *AZONE* & *GAROLO BESTIA*, *IOANNE MARIA PARAVICINO*, *IOANNE CUVICCIARDO*, & alijs aliquot viris nobilibus. Ex Calvinistis, multi subito oppressi, cæsi, fugati, aut in exilium acti. Patet ea Vallis in longitudine ad sexaginta milliaria Italica, & ad septem in latitudine: mediam intersecat *Addua* fluuius, Plinio & alijs veteribus notus, qui in lacum *Larium*; hodie *Comensem*, deuoluitur. Haut procul ab ostio fluminis *PETRVS HENRIQUES*, Comes Fontanus, Mediolanensis provinciae, pro Rege Catholico, Gubernur, arcem nouam, quam hodie *Fontanani* nuncupant, anno 1603. exstruxerat, ad Rhætos, recenti foedere Venetis obstrictos, in officio continendos. Arcis vicinitas *Robustello* ac socijs animos addidit, ad iniurias Catholicis, per hæreticos, & *Salicos* Venetorum fautores, illatas, aliquando vindicandas. Nam

*Arcis fontana.*

præter

præter IOANNEM Episcopum Curiensem exilio multatum, & NIC. RVSCAM, Archipresbyterum Sodriensem, dira morte sublatum, alios insuper non paucos Catholicos varijs pœnis affecerant: & plures afficere aut pellerere parabant. Sed patientia tot annis læsa tandem in furorem erupit, & exules ad patriam seruitute ac tyrannide liberandam, excitauit atque armauit. Ad facinus exsequendum dies decimus nonus Iulij constitutus: cessitque res feliciter, copijs auxiliaribus, ex Insubria alijsque prouincijs, sponte ac magno numero mox confluentibus. ROBUSTELLVS itaque Vallis vniuersæ Gubernator à ciuibus constitutus, aduersus *Venetos, Rhatos ac Bernenses*, qui aliquot millia militum Rhætis submiserant, primum COMESII FIGVEROAE, Ducis Feriæ, Gubernatoris tunc Mediolanensis, post PHILIPPI III. Regis Catholici opem ac protectionem implorat, & obtinet. Sic hostibus cæsis, Vallis-Tellinæ dominium penes Catholicos mansit.

Ceterû quibus conditionibus a. 1513. (quo tēpore Galli Insubriâ armis infestabāt) Vallis-Tellinenses Grisonibus accesserint, patet ex *Articulis*, anno eodē inter ipsos ex vna, & Episcopū Curiensē, ac tres Ligas Rhætorū, ex altera parte cōclusis; qui sic habent, ex autographo, hætenus in vrbe Curiensi adseruato, fideliter descripti:

Articuli  
an. 1513.  
inter Val-  
Tellinen-  
ses & Gri-  
sones com-  
clusi.

Primo, quod homines Vallis-Tellina & Communitatis Tilij, velint & debeant Reuerendissimo Domino Episcopo Curienfi, & tribus Ligis perpetuis temporibus, in omnibus & singulis licitis & honestis, parere & obedire.

Secundò, quod pralibati homines Vallis-Tellina, & Communitatis Tilij sint & esse debeant nostri, videlicet Reuerendissimi Domini Episcopi Curienfis, & omnium trium Ligarum, cari & fideles cõsæderati, & tales permanere, & pro tempore, quo necesse fuerit, ad dietas nostras vocati, in concilijs pariformiter nobiscum sedere, & consulere omne id, quod eis Communitatibus magis expediens videbitur: & quando ad dietas sic, & pro vt supra, vocabuntur, tunc debeant de quolibet Tertio & Communitate Tilij vnum mittere Consiliarium.

Tertio, quod homines Vallis-Tellina, & Communitatis Tilij gaudeant & vtantur eorum privilegijs, & antiquis consuetudinibus, si saltem fuerint de iure laudabiles, & Deo consonæ.

Quarto, quod pralibatus Reuerendissimus D. Episcopus Curienfis, & omnes Liga, sint & esse debeant dictis hominibus Vallis Tellina, & Communitatis Tilij, adiutorio & consilio erga Casaream Maiestatem, & Ducatum Mediolani, aut alibi vbiunque oportuerit: & liberi fiant à taleis & similibus, vt homines trium Ligarum.

Quintò, quod homines Vallis Tellina & Communitatis Tilij teneantur singulis annis dare & sol-

uere Reuerendissimo Domino Episcopo Curienti, & omnibus tribus Fæderibus Tainenses mille, in promptis denarijs persoluendos, per quemlibet aut quoslibet habentes bona in dicta Valle, ad ratam bonorum suorum exemptorum & non exemptorum.

An pacta ista seruarint Grifones, equis rerum æstimatoribus discutiendum relinquo.

VAL-TELLINENSIBVS pro libertate certantibus, RVDOLPHVS PLANTA, vir bello clagus, Vallem Musteliam, & GIOVARRIVS Misancinam inuasit, acri bello Caluinitis indicto. Exemplis hisce moti alij pariter animos ad libertatem erexerunt.

Mense Augusto AMBROSIVS SPINULA, florentissimi exercitus in Belgio, iussu PHILIPPI III. ALBERTI Archiducis, cōscripti ductor, in Palatinatum inferiorem, & IOANNES GEORGIVS, Saxoniz Elector, Cæsari fidus, in Lusatiam irrupit, & Budisium obsedit. Excitata ad Rheni & Mœni confluentem regia munitione, primò Cruccenacum post Alseium, Oppenheimium, Baccheracum, Traubacum, & alia ad Rhenum ac Mosellam oppida arcesq; SPINULA, vix vlllo suorum, damno, occupauit, SAXO Lusatios & Silesios ad fidem Cæsari præstandam compulit.

Subacta Austria, BAVARVS & BVQVORIUS, iter recta in Bohemiam capessendum, & Pragam, rebellionis arcem, communibus armis iunctisq; copijs petendam censuerunt.

*Spinula  
Palatinatum; Saxo  
Lusatiam  
inuadit.*

*Bavarus &  
Buquius  
Bohemiam  
intrans.*

Septembris itaque quarto die, *Buquoius* sacra synaxi pastus, in iter per *Longolusianos* montes arduos se dedit; die septimo castrum *Cromouienſe*, in rupe munitum, ad deditionem coegit; & octauo die, qui Virginis Matris natali facer, in optatissimos *Bauari* amplexus irruit, magno stipante nobilium procerum agmine.

Nono Septembris, *Bauaro* intuentem ac stupentem cum suis omnibus, *Cæſaræanus* exercitus spectandum se præbuit. Veterani milites, ordine ritè seruato, visi sunt totidem propè Centuriones. Eodem die sub vesperam *Hornam* suo solo milite *Cæſareano* *Buquoius* obsedit, & sequenti die fulminantibus tormentis expugnauit.

Progrediuntur deinde ambo exercitus, distâter quidem, non tamen remotè, *Bauaricus* à sinistris, *Cæſareanus* à dextris, ea inter utrosque tranquillitate, ut non diuersi exercitus, non diuersæ nationes, sed vnus populus, vna videretur esse progenies.

*Roseberga.*  
*Budoitium.* Per *VVeidhouium*, *Gmundium*, & alia loca, *Budoitium* 22. Septembris est peruentum. Est id oppidū Regi in primis suo fidum, sæpius ab hoste tentatū, semper tamen intemeratū, & à milite *Buquoiano* fortissimè defensum.

Communicatis hic consilijs per duos dies, it *Bauarus* 25. Septembr. *Budnam*, *Buquoius*  
*Bræcadlitū.* *Bræcaditium.* *Budna* prudenter ac tempesti-  
uè Ba-

uè Bauaro se submisit: Bracaditium pertinacioribus animis vsum, superatis militū virtute mœnibus, crudeles pœnas 27. Octobris dedit. *Pisca* deinde, superioris anni clade adhuc fœda, nouo tamen milite ferox, ab vtroque exercitu cincta, dum superbos animos feriùs ponit, ab indignabundo milite Kalendis Octobris inuaditur, & miserabili strage per omnia compita fœdatur; *Bauaro* frustra obnitente, & ipso *Buquoio* contra militarem rabiem stricto ense nequidquam procurrēte. Reliqua demum oppida maluerunt portas ad intrandum venientibus aperire, quàm claudere; ne claudendo efficerent, vt nemo deinceps suorum exiret.

Octobris die 8. ad *PILSINAM*, à Praga *Pilsina* totius regni secundam urbem, peruentum est: sed enim Pilsina curæ Deo fuit, qui noluit, vt Catholici ciues, tot exemplis & pietatis & inconcussæ fidei erga Regem suum clari, iteratò ea ferrent, quæ duobus ab hinc añis ab *Ernesto Mansfeldio* expugnati, magno bonorum omnium gemitu, tulerant. Parsum igitur lugenti adhuc vrbi, calliditate eiusdem Mansfeldij, qui eam cum imperio obtinebat, & nostros versutissimis commētis per integros dies vndecim delusit; magno certè incolarum bono, vt nimirum sine cæde ac sanguine, anno proximè sequenti, à Legato *Mansfeldij* ad obsequiū reduceretur.

*Comitia  
Dampetra  
mors.*

Menſe Octobri medio, Comes Dampetræ, ad *Poſonium*, Hungariæ metropolim, in-  
faſto ictu proſtratus cecidit. Erat nobili apud Lotharingos genere natus, ſed virtute bellica & rebus fortiffimè geſtis longè nobilior. Fratres duos reliquit militaris gloriæ æmulos, Cæſari pariter militantes.

*Raconitiū.*

Die 22. Octobris, circa Pillinam velut inducijs pactis, noſtri hoſtibus imminentes, eos ad *Raconitium* ſunt aſſecuti. Octobris 26. ad *Placenſe* monaſterium vterque exercitus acceſſit, & loco gradatim eleuato, velut in naturali amphitheatro (quod alibi non contigit) ſeſe mutuo conſpexerunt. Ibidem etiam lætum à pluribus viſum eſt boni omnis portentum: cuspis vexilli legionarij, *Guilielmi Verdugi*, Belgarum ductoris, quod poſtea in Pragenſi prælio prælatum primo loco fuit, aliquamdiu ignea luce effulſit.

*Boni omnis  
portentum.*

Quod & legioni quintæ Cæſaris, in bello Africano (quo tres vno die exercitus, *Scipionis*, *Afranij* & *Iuba* ſuperauit) Plutarchus memorat contigiffe.

*Victoria ad  
Raconitiū.*

Pridie Kal. Nouembris, cùm exercitui Bauarico prior acies obtigiffet, Dux Sereniſſimus hoſtem è ſilua, quæ *Raconitio* adiacet, fortiter pepulit: rem ſtrenuè inter alios gerentibus *Neapolitanis*, quos equitatu Bauarico admiscēdos Buquoius miſerat. Centeni aliquot ex hoſtibus cecidēre: Austria-

cus



cus Baro *Teuffelius*, & vexillum prætorianum supremi Ducis Anhaltini, in potestatem venerunt.

Sequentibus diebus Bohemus intra vallum hæsit, certatumque aut eminus tormentis, aut cominus velitationibus, sed magna ex parte inanibus.

Nouembris die 4. opportunè in castra aduenerunt copiæ auxiliares à IOANNE GODEFRIDO, Herbipolensi ac Bábergenfi Episcopo (cuius ea vox laudatur, *Vna manu gladium, altera Breuiarium*) submissæ. Numerus dicebatur octo circiter millium: sed tam equitum, quàm peditum ita instructorum, vt firmissimum esset exercitus Bauarici ornamentum. Eodem die BVQVOIVS, dum ad suorum cum hoste velitationem accurrit, musqueti globo in vtroque femore vulnus strictim accepit.

*Buquoius  
læditur.*

Die sequenti, cum hostes elicere in pugnam nulla spes superesset, *Raconitio* discessum est, lento tamen gradu, acieque egregiè ordinata: vt nihil ad hostes irritandos in pugnam posset esse efficacius, nihil ad speciem delectabilius, nihil ad retundendos aduersarios firmius. Itaq; recta PRAGAM nostri properat: quod vt ANHALTINVS, supremus hostilis exercitus ductor, animaduertit, vallo, quod sibi ac suis firmarat, excessit; & ne priores nostri Pragam venirent, cum suis mirè festinauit.

Septimo die sub vesperum, cùm in planicie, instructis ordinibus, hostis visendum se præbuisset, BAVARVS aciem quoque suam ostendit, & à velitibus prioribus aliquantulum prælusum est, sed nullo commodo aut incommodo, ipsa nocte pugnam dirimente.

*Gaucherius equisum Colonellus.*

Visum igitur nostris belli Imperatoribus, ne semper Bohemus elabi posset, noctu quoque proficisci, donec tandem ad fatalem vltimi certaminis metam peruentum, BUQUOIVS porrò mandavit nobili ac fortissimo viro GAUCHERIO, natione Burundo, equitum Colonello, vt proximè castra hostium noctu exploraret. Cognita eorum fuga, idem *Gaucherius*, cum sexcentis equitibus nostratibus, cunctisque Polonis, & Belgarum quingentis musquetarijs, Hungarorum sex millia aliosque hostes aggressus, ex ijs ducentos amplius occidit, & equos circiter mille abduxit. Et nisi vetitum illi à *Buquoto* fuisset progredi, vniuersum hostilem equitatum haut dubie dissipasset. In hac expeditione inter primos à Gaucherianis Baro PETERSEMIUS fuit, qui primarium Hungarorum ducem manu propria interfecit. Atque hoc quidem non solum initium, sed pignus atque arrha totius victoriæ fuit; territis adeò Hungaris, vt die proximè sequenti, cum ad manus

*Petersemij  
Baronis  
laus.*

nus ventum esset, terrorem toti exercitui iniecerint, suæque fuga aciei suæ ordines perturbarint.

Hortus est & amplitudine & amœnitate, dimidio milliari à Praga, celebris, cuius septis lepores, cerui, aliæque siluestres feræ, in oblectamenta Regû, coercentur. Pone hunc ad *Stellam* palatium (ita nuncupatum, quod eius speciem gerat) *Anhaltinus*, dux hostilis exercitus (qui viginti quinque amplius armatorum millibus constabat) ut periclitantem *Pragam* tueretur, castra in colle collocavit, & festinata militum opera; insequentibus nostris copijs vallum obiecit, breue solatium mali imminientis. Et vero temeritatis videri poterat (si leges prudentiæ militaris spectemus) tam iniquo loco, cum hoste adeo potente ac numeroso, munitum intra vallum hærente, & copiosissimam ciuitatem à tergo habente, prælium inire: euicit tamen consilium verè diuinum, quo generosa Ducum nostrorum pectora vrgebantur. Verè à Domino factum est illud, & est mirabile in oculis nostris. Dubitantibus itaque nostris animos addidit. P. DOMINICVS, natione Aragonius, ex ordine Carmelitarum discalceatorum, vitæ morumq; integritate clarus, quē BAVARVS secum ad castra adduxerat. Is certam à Deo victoriam pollicitus, Ioannis Capistrani, & alio-

*Stella palatium.*

*P. Dominicus ex ordine Discalceatorum.*

*Prælium ad  
Pragam.*

& aliorum exemplo, Christi crucifixi effigiem in hostes intulit. IOANNES SERCLASIVS, cognomento TILLIVS, nobili apud Brabantos genere natus, BAVARI imperium in Boico exercitu est executus, & sinistrum latus in aggressu tenuit. RVDOLPHVS TIEFFENBACHIVS, mandante BVQVOIO, Cæsareanos ab dextro cornu in hostem duxit.

*Victoria verè  
miraculosa.*

Modestiae porrò pugna fuit inter BAVARVM ac BVQVOIVM ( huic namq; in rheda ob vulnus sedenti is perpetuò aderat ) vter ante prælium ad castrorum Præfectos esset verba factururus. Post ancipitem disceptationem, dicendi onus volens nolens tandem Buquorius suscepit: tessera verò à Bauaro mox data est, felici omine, MARIA. Prælio deinde incohato, P. Henricus Fitzsimon, Soc. Iesu presbyter, natione Hibernus, hymnum, SALVE REGINA, iussus est recitare, vtroq; belli Imperatore respondente. Et manifestum cæleste nostris auxilium mox adfuit. Exercitus namque hostium omnis, terrore diuinitus immisso, fusus fugatusque, sex amplius millia cæsa, mille circiter demersi, Muldaq; flumine absorpti, quingenti ( quos inter filius primogenitus Anhaltini, item Stirumensis, Sclikensis & Rhenensis Comites ) capti, tormenta decem maiora, cum vexillis plus minùs centum militaribus, adempta.

pta, castra omnis opulentia plena à nostris direpta, cum *Frederici* ipsius periscelide, quæ postmodum *Bauaro* à Belga milite, nobili genere nato, est oblata. Ex nostris vix ducenti quinquaginta cecidere. PALATINVS, eo tempore Pragæ hærens vt suos cæsos esse, & nostros (quos inter primi fuere Belgæ) ad vrbis muros accedere intellexit, cum vxore, *Anhaltino* seniore, *Turriano*, & alijs proceribus, in Silesiam turpiter fugit; & qui animo Imperium Romanum iam deuorarat, vix repperit quò se tuto reciperet, crimenque rebellionis pudenda omne in æuum strage expiauit.

Notatum à curiosis, eo ipso die, quo miraculosa atque illustris illa victoria de hoste prædone parta est (incidit enim in Dominicam XXII. post Pentecosten) illud ex Matthæi Euangelio ab vniuersa Ecclesia Catholica recitatum fuisse; *Reddite quæ sunt Cæsaris, Cæsari, & quæ sunt Dei, Deo*. Notatum itē Sanctis in cælo degentibus diem illum (qui & Festiuitatis eorumdem, & Nouembris erat octauus) sacrum fuisse. Vindictæ nimirum diuinæ tempus aderat, & lacesiti per annum Diui in Calvinistas, hostes suos, arma pariter sumpserant; ne eos porrò in cælo sedere cæcos ac surdos calumniarentur.

Die proximè sequenti, PRAGA minor *Praga dicitur.* (constat enim ea tribus vrbibus, *Minore*, quæ est pul-

est pulcherrima, *Veteri ac Noua* ) primum sese dedidit: quod exemplum mox reliquæ sunt secutæ. In vrbe regni corona, cum gazis regijs, reperta, maior item Nobilitatis pars deprehensa, atq; inter alios *filius & vxor* Comitum Turriani.

Atque hæc est nobilis illa pugna, qua vniuersum Bohemiæ regnum vno velut ictu, est subactum; qua Bohemi ante hunc diem, vt credebatur, inuincibiles, prorsus fracti sunt ac profligati; Bohemi inquam illi, quorum militari ferocia, ante ducentos annos, *SIGISMUNDVS* Cæsar, totius Imperij viribus stipatus, *Zisca* duce, infami cæco, fusus est ac fugatus. Hæc est illa pugna ad septa leporum carceresq; ferarum, vbi insausto omine castra Bohemi fixere, paulò post instar ceruorum ac leporum fugituri, instarque ferarum fugandi ac mactandi. Hæc est illa pugna ad *Stellam*, quam anno præcedente Stella tremendo crine rubens portenderat. Hæc est illa pugna, quæ non modò Germaniam, sed vniuersum orbem Christianum, ab immani Calvinistarum tyrannide, debellato eorum coryphæo atque antesignano, liberauit.

*Cometa.*

*Buquoium  
intrat Pra-  
gam.*

Die 9. Nouembris, sub horam vndecimā *BUQVOIVS*, non pompa triumphali Capitolium, sed supplici pietate *Capucinatorum* Pragensis templum ( quod vnicum Catholicis  
ea in

ea in vrbe restabat) ingressus est, rem diuinam auditurus. Post horam duodecimam, eodem die, MAXIMILIANVS Bauarus, in eorundem Patrum monasterium aduenit. Difficile dictu est, quanto bonorum omnium applausu vterque fuerit exceptus.

Ipsa die S. Martini, vniuersa Praga (tribus enim, vt dixi, oppidis ea constat) in FERDINANDI Cæsaris verba iurauit, & Bohemiæ Ordines iam subacti biduo post, ingētē acruum cōfederationū, cum *Morauis, Silesiis, Lusatias, Hungaris, Gabore*, Austriacis superiorib. & alijs initarum, eidem Bauaro tradiderūt.

BUQVOIVS cū lecto decumberet ex vulnere, post victoriam adeptam missus est Princeps CAROLVS LIECHTENSTENIVS *Carlostenium.* cum copijs ad *Carlostenium*, vetus Bohemiæ castrum (in quo regni corona asseruari solet) expugnandum. Cuius loci milites, præfidiarij sexcenti, partim Angli, partim Scotti, mox sese dediderunt. *Launum, Slaunum, & Slaunum.* alia vicina oppida vim metuentia, Cæsareano militi portas pariter aperuerunt.

Die 12. Nouembris, BAVARVS ex vrbe Pragēsi ad PAVLVM V. Papam litteras dedit, miraculosæ huius victoriæ indices: quarum exemplar hic habes.

Beatissime in Christo Pater ac Domine, Domine clementissime: post humillima beatorum pedum oscula. Respexit tandem Deus O. M. Ecclesiā suam, eiusq̃

eiusq<sup>3</sup> hostes debellauit, & fregit, illustri sanè victoria, quæ iure merito Victoria Dei vocatur. Ego quidem & veni & vidi, pugnaq<sup>3</sup> præsens fui, sed vicit optimus Deus, cui omnem victoriæ titulum gratissima mente ex solido adscribo. Verè manus Domini nobiscum fuit, quæ hostem tam potentem, & locotam munito sese opponentem deuicit. Nec sine singulari Dei prouidentia factum videtur, quòd cum hoste congressi simus ipso Sanctorum omnium octauo die, qui idem fuit cum Dominica vicesima secunda post Pentecosten, quo Euangelium ritu Romano prælegitur, Reddite ergò Cæsari, quæ sunt Cæsaris. Reddidit certè Palatinus Elector, quamuis inuitus: qui ubi cladem sui exercitus accepit, vna cum coniuge, Praga cecidit, & vel hoc ipso Catholicum agmen vicisse, professus est. In qua Dei victoria quadam prorsus admiranda contigere. Hostis erat numerosus, nec non veterani militis robore carebat: hūc etiam locus ipse fecit audacem. Nam in monte, vbi Pragensi contiguo, instructissimam contra nos aciem direxit, & quamuis ego, cum vniuerso exercitu, tota penè nocte iter fecerim, hoc solum fine, vt hostem assequi, & cum eo configere liceret, conflictus tamen initio admodum iniquus videbatur & impar, cum hostes in oportunissimo sibi loco, nec minus munito, facilem in nos pugnam sortiti essent. At demum præmissa deliberatione, ante omnia Deo fidendum, & ope diuina nitendum esse rati, ex iniquo etiam & inferiori loco, hostem



hostem cominus aggressi sumus. Videbatur quidem  
noster exercitus sub initium nonnihil nutare, sed  
mox resumptis animis & alacritate, iuit in ho-  
stes, & eos è monte profligauit, tormenta anea  
maiora occupauit, omnibus aduersa partis aut ca-  
sis, aut in fugam actis. Ita dispersi fusique ad in-  
terneccionem vsque deleti sunt: nec prius destitere  
nostri, quam fuga dissipatos ad ipsam urbem inse-  
cuti, varia in eos cade grassarentur. Numerus  
quoque casorum excreuit, vt plura millia inter-  
fectorum numerarentur; cum ex parte nostra vix  
centum desiderati; plures tamen laesi sunt. Præter  
tot ex hostium numero casos, aliquot capti; inter  
alios Principis Anhaltini filius natu maxi-  
mus, qui etiam grauiter laesus est, duo Comites,  
& plures Nobiles & Capitanei.

In eadem pugna, præter centum vexilla de-  
cem quoque maiora curulia tormenta hostibus e-  
repta sunt. Hungari, multis iam eorum prostratis,  
vt fuga se seruarent, in Moldam flumen sese præ-  
cipitarunt, tranaturi: sed mille circiter in aquis  
interiisse dicuntur. Et quidem pugna ad horam te-  
nuit, die, vt dictum, octauo omnium Sanctorum,  
qui sese de suis hostibus insigniter sunt vlti. Die se-  
quenti, qui fuit nonus, qui & Dedicatio basilicæ  
Saluatoris, ciuitas Praga deditiõis ad me misit  
litteras, se in Cæsaris potestate posthac futuram.

Altero ab hoc die, tam vetus, quam noua  
Praga. (est enim tripartita ciuitas) obedientiam  
Imperatori, sine exceptione omni, promiserunt.

D

Hodie

Hodie quoque regni Bohemici Status, Comites, Barones & Nobiles, crimen publicè deprecati, mihi, nomine Caesaris, nouum homagium promiserunt, & confederationibus omnibus, tam cum Regno Hungaria, quàm alijs initis renunciauerunt, ipsaque confederationum instrumenta ad meas manus tradiderunt. Itaq; in hoc anno, Deo soli laus, Austria superior omnis Caesari subiecta, inferior tranquillata, & ab hoste liberata, & complures Bohemia tam vrbes quàm arces captae, ante Pragam hostilis exercitus profligatus, Praga occupata, & Status regni Bohemia in Imperatoris fidem & obsequium reducti.

Hac S. V. compendio narrare, simulq; Ecclesia Romana gratulari, par erat. Interim S. V. submissem & plurimum me commendo, atq; ad pedum osculum reuerenter submitto. Praga die 12. Nouembris, an. 1620. S. V. deuotus & obsequentissimus filius & seruus Maximilianus.

Pauli V.  
Papa episto-  
la ad Ba-  
varum.

Ad has litteras Paulus V. Papa die 3. Decembris sic respondit: Dilecto filio nobili viro Maximiliano Duci Bauariae Paulus Papa V. Dilecte fili, nobilis vir, felicissimum, & supra quàm dici potest, nobis & vniuersa Christiana Reipublica optatissimum Pragensis victoria numium attulerunt literae tuae. Quam quidem victoriam, vt de immensa Dei potentia confidentes, non dubia spe praeuebamus, ita nunc de ea tam copiosè, tam mirabiliter parata, immortales ei, qui facit mirabilia magna solus, gratias agere non desistemus.

mus, Tibi verò in visceribus Iesu Christi vnicè dilecte fili, totius Ecclesie nomine, cui immeritò præsidemus, ex intimo præcordio gratulamur, quòd nimirum res aded præclaras tam fortiter, tam brevi tempore gesseris, vt quemadmodum scribis, veneris, videris, & Deo duce, viceris per fidos Christi hostes, & Romano Imperio rebelles. Laudet, fili, vsq; ad mortem anima mea Dominum, quoniam adiutor & protector factus est nobis. Equidem Nobilitatis tue litteris lectis, toto spiritu in Domino exultantes, ecclesiam S. Mariae Maioris petiuimus, ibique humiliter prostrati, cum lacrymis de summo accepto beneficio debita persoluimus, cum auctori omnium bonorum Deo, tum sanctissimæ Matri misericordiarum, & Reginae Sanctorum omnium, in quorum sollemnitatis octauo die victoriam diuinitus tibi delatam fuisse scribis. Vt minimè dubitandum sit, quin tibi pro gloria Dei strenuè dimicanti cœlestis exercitus auxilium illa die præsens adfuerit. Ad huius porro beneficii magnitudinem, quàm grato possumus animo, prosequendam, solennes indiximus in hac vrbe supplicationes ab ecclesia S. Mariae, quam appellant supra Mineruam ad ecclesiam S. Mariae de anima: ad quam nos venientes, sacrosanctum Missæ sacrificium Omnipotenti Deo, in gratiarum actionem, obtulimus. Nullum certè erit tempus, in quo collati eximij doni memoria ex animo nostro deleatur, quin semper indies magis magisque vigeat,

D 2

sicut

sicut & Illustris tuæ virtutis, tuorumq; gestorum immensa gloria perpetuò nobis ante oculos versabitur, omnisque consequens ætas meritis illà laudibus celebrare non desistet. Nec est, quod aliquo pacto vereamur, ne ista tua virtus vnquam defatigetur, quin firmiter sperare debemus, eam ex ipsis, pro Christi atque ipsius Ecclesiæ honore, feliciter susceptis laboribus, maiores quotidie vires accepturam, deq; Christiana Republica maiori etiam, si fieri posset, conatu optimè promereri nunquam cessaturam.

Quo sanè fiet, vt antiqua Bauarica familia decora tuis egregijs factis indies exornentur & cumulentur, & ipse temporalis atque etiam æternæ felicitatis amplissimum pramium ab eo, qui est liberalissimus remunerator, consequeris. Nos certè tantum Nobilitatis tuæ merito tribuimus, vt quæ vnquam à nobis, atque ab hac Sancta Sede in te, tuamq; familiam proficisci poterunt, ea semper vobis parata fore, pro certo habeas, velimus.

Interim Nobilitati tuæ à Domino secunda omnia optamus & precamur, & iterum paterna nostra benedictione, toto cordis affectu, benedicimus. Datum Roma, apud S. Mariam Maiorem, die 3. Decembris, 1620. anno 16. Pontificatus nostri.

Paulus V.  
ad Bnquo  
ium scribis.

Cæterum vt ad BAVARVM, sic etiam ad BVQVOIVM idem Paulus Pont. Max. die 19 Decembris litteras dedit, eumque laudauit de constanti virtute, strenuitate, felicibusq; laboribus, in hac Pragensi victoria consequenda,

pro

*pro Catholica Religionis & S.R. Imperij dignitate ac salute.*

Nouembris 17. die, BAVARVS Praga dis- *Bauarus  
Praga dis-*  
cessit, & die 25. eiusdem mensis MONA- *cedit.*  
CHIVM appulit; LIECHTENSTEINIO  
Principe Pragæ relicto, vt regni Vicario, v-  
nà cùm TILLIO ac maiore parte copiarum.

Victoriâ porrò obtentâ, IOANNES LO-  
HELIVS, Pragenſis Archiepiſcopus, cùm  
clero Metropolitano, GASPAR QVAES-  
TENBERGIUS, Abbas Strahouienſis, qui  
eſt ex familia Præmonſtratenſi, *Dominicani,*  
*Franciſcani, Patres Soc. Ieſu,* & alij ordinis  
Eccleſiaſtici viri, cùm ad urbem rediſſent,  
haut facilè dixero, quanta mox facta fuerit  
vitæ morumq; in melius commutatio, quã-  
ta ciuium ad Romano-Catholicam Eccle-  
ſiam acceſſio. Vt de iſta, poſt *Frederici* Pala-  
tini expulſionem, futura apud Bohemos  
Reformatione, *Ioannes Liechtenbergius,* cele- *Io. Liech-*  
bris apud Germanos Aſtronomus, non om- *tenbergij*  
nino vanus fuiſſe vates videatur. Cuius qui- *Prognosti-*  
dem *Prognosticon,* anno milleſimo quadrin- *con.*  
geſimo octogefimo quarto ſcriptum, &  
Coloniæ an. 1526. ſecundò excuſum, in gra-  
tiam curioſorum, hic libet attexere.

*Sedes Bohemorum hereticabit in Aleman-* *Ex cap. 7.*  
*nia, & zizanio denigrabunt triticum Pralato-*  
*rum Rhenenſium. Flumen Palatinorum tyran-*  
*niſabit, adducens alienos in propriam patriam:*

quod, heu, dolendum erit. Aer Moguntinus Ecclesiasticabit, solis precibus placabit Cuncti-  
potentem.

Attendite viri prudentissimi dictum Domini dicentis: Omne Regnum in se diuisum desolabitur. Estote ergo prudentes, ne Imperium destruat: cessante enim sacro Imperio, seculum consummabitur. Aspicite Aquilam quasi deplumatam: heu, pennulae ceciderunt ab alis eius, quia volare nequit. Omnes ergo Principes indubitanter, qui ad hoc dant operam, ut Imperium destruat, quantum ad hoc sunt praecursores & nuntij Antichristi. Caueant ergo septem Principes Electores, & eorum ministri, ne peccatis & culpis eorum exigentibus, iusto Dei iudicio, Imperium ab ipsis auferatur. Nam necesse est ut scandala veniant, & illis, per quos sunt ventura.

Ex cap. 9.

Nouus Princeps exurget in breui tempore. O alma mater Ecclesia, plange! O Virgo Rheni, clama: ululate Pastores & Doctores. Factus est mihi quasi Leo insidians: ideo versum est in luctum gaudium meum, O plebs misera: quia Regulus nouus surrexit in te, non Gubernator, sed Desolator fidelium, non Consolator, sed Deprædator spiritualium, non Protector, sed Depressor orphanorum & viduarum, in tota alta Germania. Nouus Destructor, Nouus Rex, sine ruga, Germaniae Principibus videbitur accedere. Hic patrimonij Iesu dilapidator, hic erit Draco perniciosissimus, persequens Sponsam Christi, in multis

multis diœcesibus : qui perturbabit terram , ponet orbem desertum , non dormiet , sed continuo machinabitur malum : cuius consilium est cum impijs , & stabit cum consilio iniquorum. Nullus veterum tyrannorum fecit tot & tanta pernicioſa , quanta hic in populo Alemannico faciet. Non timebit Deum , non parcat Sanctis : non formidet capita fidei , non veretur exterminare loca ſacra , non pudet eum committere ſacrilegium. Heu quanta perficiet contra Catholicam ordinationem ! vix lingua ſufficit enarrare. Punieris à Deo , ô radix peccati , verè punieris à Deo. Nam hoc tibi ſignum erit : Aurum ſapientiæ tuæ obſcurabitur , quia phreneticabis , rumor ſamæ tuæ inſatuabitur , mutabitur color tuus optimus & diceris per totum mundum Hereticus. Obmutefce ergo abominatio , ne cogites quouis modo ſeminare zizaniâ ſilueſtris Leonis inter Germaniæ Principes ac Imperium.

Heu Beelphegor , & Hæreſiarcha Bohemorum ; Regulus venenofus , qui ſe pro Rege Bohemiæ gerit , Romanæ Eccleſiæ , ac orthodoxæ fidei hoſtis acerrimus ; ſponſa Chriſti turbationes plurimas afferet , egregioſque viros interficiet. O iuuenis ad bella ductus per tuos , quomodo audeſ viuere in ſtatu , in quo mori non audeſ ? Neſciſ quod ſepelieris , ſepultura aſinina ? Progenitores tui , viri Catholici , viri famoſi. Quid tu gloriariſ de Doctõribus tuis excommunicatis ? Tu pelles mortuas viſ conſulere , id eſt

Ex cap. 20.

*Hæreticos qui nesciunt quid dicunt. Sequere Paulum.*

*Cum in atate tenera fuisti, sicut à parentibus ducebaris, sic fecisti. Iam ubi ratio sensui capis dominari, excute, quas, quas sunt paruuli. Corrige, emenda vitam tuam, & Idolum tuum excommunicatum, vt viperam, fuge. Post te veniet, qui Ecclesiam Pragensem adducet ad Matrem fidelium, & erit noua Reformatio in Bohemia. Haftenus ex Leichtenbergio.*

*Buquoius  
Morauia  
subigit.*

Ad BVQVOIVM verò vt redeamus, is vt primum sensit se meliusculè habere, die 12. Decembris, Praga Morauiam versus cum exercitu discessit. Aduentanti Morauorum legati obuiam venere, nuntiantes quidquid ipse mandaret, sese facturos. Is nihil aliud ipsis imperauit, quam vt Cæsaris arbitrio sese statim submitterent: quod & præstiterunt, Catholicorum templis Olmutij, Brunæ, & alibi mox restitutis; adhæc Patribus Soc. Iesu, cum reliquo clero, domum reuocatis.

*Regis Gal-  
liares in  
Bearnia  
gesta.*

Octobri mense anni eiusdem, vt Caluianorum insolentia non vno loco retunderetur, LVDOVICVS XIII. Gallia Rex magno zelo in Bearniam profectus, Episcopos Oleronensem & Lascariensem, per IOANNAM Nauartæ Reginam ab annis quinquaginta pulsos, plenè restituit; in oppido prouinciæ primario, quod PAUVM vocant, Roma-



Romano- Catholicæ religionis exercitium publicè fieri iussit; Societatis Iesu collegium ibidem constituit, & *Nauarrinum*, amotis Caluinistis, præsidario milite Catholico sibi asseruit.

Maiores nostri varias olim expeditiones sacras contra Hæreticos, Mahumetanos, aliosque infideles susceperunt. Sub VRBANO II. Papa, anno 1096. *Petro Eremita* incentore, GODEFRIDI BULLONII auspicijs, cruce signatus exercitus Hierosolymam occupauit. Sub INNOCENTIO III. nostri Constantinopolim expugnarunt, Græcumque Imperium in BALDVINVM Flandriæ Comitem transtulerunt. His & alijs exemplis moti viri primarij *Sodalitatem Defensionis Christianæ*, aduersus Turcas & Caluinianos hoc anno instituerunt: quam suis deinde diplomatibus, ALBERTVS Belgarum Princeps, Electores Ecclesiastici, MAXIMILIANVS Bauariæ Dux, alijque Principes confirmarunt. Et verò instare nunc tempus delendi Imperij Turcici, *Ioannes Buchenius*, Doctor Sorbonicus ac Tornacensis Archidiaconus, in sua Corona Mystica & *Marcus Aurelius Scalig*, in suo libro, quem de Ordine equestri militiæ Christianæ ad *Carolum Gonzagum* Ducem Niuernensem, Italianè conscripsit, alijque abunde docuerunt. Rogandus Deus, vt Christianorum Principi-

*Sodalitatis  
Defensionis  
Christianæ.*

pum animos concordia iungat, & ad maiorum suorum æmulationem accendat. Non deerunt, priuati, cum ex Ecclesiastico, tum politico ordine, qui opes animosque conferant. Testis vel vna ANTVERPIA, quæ Godefridi Bullonij, Principis olim sui memor, promptissimæ ad sacram expeditionem voluntatis testimonium hoc ipso anno dedit. Quod alijs, vt spero, ciuitatibus aliquando seruiet exemplo.

*Hungarica rebellio-  
nis, per Gabri-  
elem Betlenium  
curata, Hi-  
storia,*

Post concordiam, per Oratores Gallicos, diu sed frustra tētatam, FERDINANDVS II. Cæsar, exeunte anno, aduersus GABRIELEM BETLENIVM, Transiluanix Principem, Hungarię incubantem, apertum bellum publicat, & præteritos omnes tractatus, ob illius perfidiam, cassat ac reuocat, diplomate die 10. Decēbris Viennæ dato. Ex quo quidē diplomate Imperiali, vniuersam rebellionis Hungaricæ historiam breuiter Lectori ob oculos hic ponere visum est.

Eo ipso tempore, quo Dei benignitate, ac concordi Principum Electorum suffragio, ad supremū Imperij fastigium FERDINANDVS II. euehebatur, vnius hominis (sed qui conspirationis suæ multos & potentes sibi affeclas coniunxerat, & cum rebellibus Bohemis vires consiliaque sociarat) effrænata dominandi libidine, atrox ac periculosum exarsit rebellionis incendium. Cuius  
nefan-

nefandæ proditionis ac perfidiæ initia, progressus, & exitus, ob dolum, fraudem, ac tyrannidem quàm maximè detestabilia fuerunt. Posteaquam enim GABRIEL BETLENIVS, quem vulgò GABOREM nuncupant, Turcico exercitu instructus, Transilvaniam inuaserat, Dominumque suum, cui iuratus fidē præstiterat, GABRIELEM BATHORIVM possessione primū TRANSILVANIAE, deinde vita exturbarat; securitati suæ consulendum, atque in eo vel maximè sibi elaborandum existimauit; vt cum Imperatore MATTHIA certas concordiae rationes iniret. Inter ceteros autem anno millesimo sexcentesimo decimo quinto stabilitæ pacis articulos, tam à BETHLENO, quàm à Transilvania Ordinibus seu Statibus, diplomate syngraphis ac sigillorum impressione firmato, promissum fuit: *Quod neque contra suam Maiestatem, eiusque legitimos successores, Reges Hungariæ, & Regnū, augustissimamq; Domum Austriacam, regna & provincias, cū quibus Regia Maiestas singulari pacta habet, vlllo vnquā tempore, auersā vel hostilē prætensionē habebunt, aut cōtra regni Hungariæ libertates, priuilegia, quietē, aut tranquillitatē, palā vel occulte quidquā fieri patiētur. Quodq; idē Betlenius & successores, vna cū Statibus & Ordinibus Transilvania suæ Maiestati suisque successoribus legitimis, & Regno Hungariæ, quandocūque*

*Betlenius  
Transiluaniam occupat.*

*An. 1615.  
cum Matthia Imp.  
fœdus init.*

*necessa-*

*necessarium fuerit, contra omnes eorum hostes (excepto Turca) omni ope, auxilio, viribus, & fidelitate aderunt.*

*Ann. 1619.  
renouat cū  
Ferdinādo.*

Quæ omnia vt eò sanctiùs seruarentur, quò arctiùs firmabantur, rursus anno millesimo sexcentesimo decimo nono, consignatis diplomatibus, eadem ipsa renouata, confirmata atq; ratificata fuere. Et BETHLENIVS quidem in verbo suo Principis, *bona fide*, Transilvani autem *fide Christiana* mediante, promiserunt, quod tam per seipsos sanctè & inuiolabiliter prædictos articulos, quam etiam per alios, quorum intererit, observari facient, successoresq; suos ad eorum observationem in perpetuum obligatos velint.

*Conspirat  
cum Pala-  
tino.*

His igitur pactorum fœderum strictissimis vinculis, securitati Hungariæ abundè prospectum, neque Ferdinando, ex parte *Betlenij*, quidquam hostile expectandum videbatur. Verùm, vix pauculis mensibus post fœdera renouata elapsis, contra fidem datam de inuadenda atque occupanda Hungaria, occulta non solùm cum nonnullis seditiosis ac perfidis Hungariæ proceribus & incolis, sed & cum rebellibus Bohemis, ac *Friederico Palatino Rhēni*, *Betlenius* consilia agitare cœpit.

Ne qua verò tectè machinationis indicia, ex apparatu bellico, quem sollicitè *Betlenius* instruebat, in publicum prorumperent, ad  
prima-

primarios regni Hungariæ proceres seu Officiales iteratis scriptionibus, per summum fingendi simulandique artificium, is ipse commemorabat, pactorum conuentorumque sibi memoriam non effluxisse, quorum vigore, vnâ cum vnitersa *Transilvania*, arctissimè obstrictum sese meminisse, vt contra omnes hostes, omni ope, auxilio, ac viribus, FERDINANDO Regi præsto se esse debere; adcoque nunc tempus adesse, quo dictorum conuentorumque constantiam publicè testatam redderet. Aliquot igitur milia militum bene instructorum, contrâ Bohemos actutum se missurum, si modò Regi adlubescat. Transiluanos quoque, quò faci- *Transilua-*  
lius incautos circumueniret, & ad arma ex- *nis imponit.*  
pedienda militemque conscribendum induceret, scæderum cum FERDINANDO initorum prætextu, acriter incitabat, vt iuxta datam fidem, auxilia eidem submittere non differrent.

Postquam & Transiluanis bellè impo-  
fuisse, & à milite satis instructum se animad-  
uertit, scriptis an. 1619. mense Iulio, ad Præ-  
fectum seu Generalem, vt vocant, Cassoui-  
ensem, ANDREAM DOCZIVM litteris, sig-  
nificat, *Varadinum* iter se adornasse; non du-  
bitare, quin varij de se rumores ab æmulis  
circumferantur, quasi Hungariæ inuaden-  
dæ consilia agitare. Ceterum monere, atq;  
etiam

*Ann. 1619.  
Doczum  
Generalem  
Cassouien-  
sem capit.*

etiam impensius rogare, ne maleuolorum sermonibus aures præbeat; nondum sibi excidisse, quid ex pactis, ac fide data, FERDINANDO Regi debeat. His alijsque verborum lenocinijs, adeò *Doczum* BETLENIVS demulsit, vt nihil prorsus ab illo metuendum sibi existimaret: donec tandem, sub initium Septembris, anni millesimi sexcentissimi decimi noni, accedente *Cassouienſium* perfidia ac proditione, idem Præfectus captus, ac compedibus constrictus, sub arcta custodia in Tráſiluaniam (vbi & vitam miserè clausit) iussu *Betlenij*, mitteretur.

*Hungariã  
superiorem  
peruadit.*

Deinceps verò vi, terrore, rapinis, bonorum direptionibus, cædibus item, atque indignissimis Regi fidelium tam Ecclesiasticorum quàm sæcularium hominum oppressionibus, grassatus BETLENIVS. *Hungariam superiorem* totam peruasit: profanatisque ac deuastatis Catholicorum templis, expulſis vel occisis Sacerdotibus, bonis Ecclesiasticis occupatis, ac viris primarijs, qui fidem Deo ac Regi coronato FERDINANDO debitam violare renuebant, patria exclusis, ipse sibi, nomine *Principis Hungariæ* adsumpto, regni dominationem nefariè vsurpauit, & *Posonium* vsque penetrauit. Vbi circumuentum *Regni Hungariæ Palatinum* vi, metuque adegit, vt cum summo iuris Regij præiudicio (Statuum namque siue Ordinum

*Principis  
Hungariæ  
situlum v.  
surpat.*

num ad comitia conuocatio ad Regem tantum spectat) generalem conuentum regnicolis *Posonium* indiceret.

Cumque armorum strepitus ac tyrannis in conuenticulo Posoniensi omnia possent, nefando atque inaudito sceleris ac perfidia exemplo, nonnulli complices *BETLENII*, praestiti *FERDINANDO* homagij ac fidei immemores, de eodem *BETLENIO* in Regem protrudendo consilia inierunt; Status Ecclesiastici vetustissimam praerogatiuam abrogandam censuerunt; praedia Ecclesiastica omnia profanis vsibus addixerunt: Officiales seu ministros Regios loco atque officio cum dedecore amouerunt; viros primarios tam Ecclesiasticos quam saeculares (quod ausus nefarios calculis suis approbare nolentes, furori rebellantium sese subduxissent) velut patriae proditores proscribendos pronuntiauerunt. Demum, ne quid ad extremum praecipitis insaniae complementum decslet, perniciofa cum rebellibus *Bobenis* confederatione inita, adscitisque eorum copijs, hostiliter *Austriam* inuaserunt, *Viennam*que, vbi tunc *aula Casarea* sedes erat, progressi, incendijs, rapinis, caedibus omnia vastarunt.

Quoniam tamen res suas necdum satis firmatas *GABOR* aduertebat, vt interea sua cum Turcis negotia constituere, *Transilvaniae*

*Inducias  
postulat.*

silvaniæ prospicere, Polonico se metu liberare, & quonam Bohemicum bellum inclinaret, explorare posset, consueto suo artificio usus, simulat ac promittit se effecturum, vt Hungaria ad obsequium FERDINANDI reducatur. Sed tempore opus esse, quo animi nonnullorum exasperati suis persuasione-  
nibus leniri queant. Inducias itaque ad festum *S. Michaelis* duraturas stabiliri, atque interea temporis, in eo quo tunc erant statu, omnia permanere, nec quidquam hostile ab alterutra parte attentari, postulat.

Induciæ vix stabilitæ fuerant, cùm homo perfidus nihil non egit, vt Constantinopoli, per falsos rumores, rebus eiusdem FERDINANDI depressis, hostium autem viribus supra verum elatis, ostentata occasione, TVRCAM ad bellum contra Ferdinandum gerendum concitaret. Ipse interea munitas COMITIS HOMONAI, arces occupavit; *Munkachium*, *Nitriamq;*, iteratis vicibus, milite circumcinxit: Germanorum turmam, sine cuiusquam noxa, secundo Danubio *Iaurinum* vectam, hostiliter inuasit: *Comaroniensem* munitionem Haidonum copijs non semel cinxit; ex arce *Posoniensi*, Germanorum præsidium exturbavit: aliaque innumera-  
rabilia, pactis Inducijs aduersantia, perpetravit. Tandem, Ecclesiastico regni Hungariæ Statu seu Ordine, qui est primarius,  
absen-



absente, regni item Sclauoniæ legatis, ac pluribus Magnatibus non comparentibus, multis prouinciarum nuntijs, iuxta mandata, quæ à suis acceperant, penitus abnuentibus, ipsis verò comitijs, per Legatos Regios, ne quid ritè vltèrius tractari posset, iam dissolutis. Cùm pridie certa mors refragaturis denuntiata fuisset, à paucis perfidæ rebellionibus concitatoribus, tumultuaria factioforum acclamatione, ann. 1620. die 25.

Augusti *Rex Hungaria* per vim ac fraudem *Rex Hungariae renuntiatur.* renuntiatus, Inducias palam rescidit, *Nitriam* expugnata, copias suas in *Austriam* cis Danubium immisit, ferroq; omnia populatus, arces & oppida varia occupauit.

Ne quid verò ad summum scelus deesset, quemadmodum in *Transilvania*, vt *Ottomannorum* gratiam demereretur, valida Christianarum ditionum propugnacula, magnis Romani Imperij sumptibus, sub SIGISMUNDO BATHORIO, Turcis erepta, videlicet *Lippam*, *Solymos*, *Totuaradgiam*, *Margitam*, *Monostor*, *Arad*, *Syri*, & *Facsathum*, Turcis tradidit; sic in Hungaria hoc ipso anno limitaneas arces & oppida iisdem Turcis consignare cœpit, tradiditq; inter alia *Vaczium*, Episcopalem sedem, inter Budam & Strigonium oportuno loco situm, magnis olim Hungariæ, sacriq; Imperij impensis recuperatum atque defensum.

E

Quæ

Quæcum ita essent, ne quod FERDINANDO vel successoribus eius præiudicium quacumque demum ratione, ex prætensa *Bethlenj* in Regem electione, regiminisque ac Regij tituli vsurpatione nasceretur, in primis hanc electionem iniustam, violentam, iniquam, seditiosam, iuribus, consuetudinibusque Regni contrariam, ac proinde irritam, inualem, ac penitus nullam esse, idem FERDINANDVS edito diplomate declarauit. Præterea quidquid in conuentu *Posoniensi*, aut *Nouizoliensi*, contra iura Regia, contra Ecclesiam Dei, ac Statum Ecclesiasticum, contra leges, libertatē, & antiquas Regni Hungariæ consuetudines, contra fideles Regis vasallos, tam Ecclesiasticos quàm sæculares, quoquo modo statutū, decretum ac definitum fuit, id totum penitus cassauit, illegitimum, iniustum, inualemque pronuntiauit: neq; illorum conuenticulorum statuta robur aliquod, vllò vnquam tempore, habitura statuit: quandoquidem, iuxta perpetuam eiusdem regni Hungariæ legem ac consuetudinem, nulla constitutio valida esse possit, quam legitime coronati Regis approbatio non firmauerit.

Quia verò, ne quid intentatum FERDINANDVS relinqueret, quo S. R. Imperio & regno Hungariæ salus & pax restitueretur, GABORI titulum *Hungariæ Principis* ea ratione

tionē detulerat, si ad fidem obedientiamque debitam Hungaros reduxisset: is verò non modò non satis fecerit conditioni, sed è contra perfidè Regnum Hungariæ eidem FERDINANDO eripere studuerit: capropter, prædictum Principi Hungariæ titulum is penitus cassauit, abrogauit & aboleuit, & bellum contra BETHLENVM publicauit. Hactenus ex diplomate Imperiali, an. 1620. die 10. Decembris, vt dixi, Viennæ dato.

*Principis  
Hungaria  
titulus  
cassatur.*

Anno M.DC.XXI. die 22. Ianuarij, BVQVOIVS, gelu niuibusque spretis, Raditzio mouit cõtra GABOREM; cuius militè è Morauia exturbauit, Ostra, VVesselio, Stransnitzio, & Scallitzio, oppidis intra triduũ occupatis.

*Buquouis  
Gaboris  
militem  
pellit è Mo-  
raua.*

Die 29. Ianuarij, Viennam ad Cæsaris aulam idem BVQVOIVS sospes redijt, ab eodem atque vniuersa Nobilitate, summis beneuolentiæ signis, exceptus.

Ineunte mēse Februário, octoginta quinque vexilla, in Pragēsi prælio potissimũ per suos hosti erepta, FERDINANDO Cæsari obtulit. Adeo quidem, vt centum sexaginta numerarentur signa militaria hostibus intra biennium adempta, ac Cæsari à Buquouis oblata.

*Cæsari ve-  
xilla 160.  
offert.*

Non succedente ex voto quadrimestri Commissariorum Imperialium & Hungarorum disceptatione, de pacis conditionibus cū Bethlenio Gabore, FERDINANDVS

Imperator, paulò post Pascha, secundo Danubio, tormenta aliquot maiora, in Hungariam misit. Paucis postea diebus, BVQVOIVS, cum exercitu viginti quatuor amplius millium, est subsecutus, *Posonium*, vulgò *Presburgum*, Hungariæ metropolim oblecturus. Sed antequam tormenta BVQVOIVS admouisset, ciues sese dediderunt, & militem Cæsareum in urbem ad miserunt. Contigit id, ab finem mensis Aprilis. Exinde *Tirnaua*, quæ Strigonientis hodie Archiepiscopi sedes est, aliaque oppida ac propugnacula pariter ad obsequium redierunt. In rebellionem perstitit *Neuheuslia*, seu *Castellum nouum*, oppidum situ, arte, & præsidio Turcico à GABORE munitum: cuius in obsidione BVQVOIVS, magno omnium luctu, occubuit: ut paulò intra dicemus.

*Presburgū  
& Tirna-  
uam oc-  
cupat.*

0

*Castellum  
nouum ob-  
sidet.*

*Bannum  
Imperiale  
publicatur  
contra Pa-  
latinum &  
alios.*

FERDINANDVS Cæsar *Bannum*, ut vocant *imperiale* contra FREDERICVM Comitum Palatinum, Ex regem Bohemiæ, IOANNEM GEORGIVM Marchionem Brandenburgensem, cognomento *lagerdorsum*, Silehiæ ac Lusatiæ turbatorem, CHRISTIANVM Principem Anhaltinum, & GEORGIVM FREDERICVM, Comitem Hohenloium publicat, diplomatibus die 22. Ianuarij Viennæ datissim quibus singulorum acta rebellionis explicat, singulosq; crimen læsæ Maiestatis commisisse declarat. PALA-

TINVS

TINVS, qui per Marchiam Brandeburgen-  
sem, vicinasq; prouincias *errabunda trahens* *Palatinus*  
*in Hollan-*  
*diam fugit.*  
vestigia, mensibus aliquot latuerat, Banno  
publicato, sibi metuens, omnibusq; se inui-  
sum sentiens, in Hollandiam, ad auunculum  
suum MAVRITIVM NASSAVIVM, Prin-  
cipem Aransionensem, cum vxore miser  
omnibusque exutus, mense Aprili se con-  
tulit; gratias scilicet eidem, alterique auun-  
culo suo HENRICO TVRRIANO, Duci  
Bullonio, acturus, pro præclaro illo consi-  
lio, quo ipsum ad capeffendam regni Bohe-  
miæ coronam, contra sôceri, IACOBI maio-  
ris Britanniae Regis, voluntatem, impule-  
rant. Optasset quidem FREDERICVS, cum  
coniuge Britanna in Britanniam transmit-  
tere: sed vetuit id sôcer, à genero regios titu-  
los ambiente, itemque à Puritanis, homini-  
bus seditiosissimis, & in Palatinum mirificè  
propensis, sibi & vnico filio suo fortasse me-  
tuens. Itaque in Haga- Comitis pauper &  
exul FREDERICVS cum vxore, IOANNE  
ERNESTO, Saxone Vinariensi, & alijs pro-  
ceribus aliquot profugis, domiciliũ collo-  
cauit Batavis, suoque etiam genero grauis:  
alijs exemplo futurus, ne viuentium regna  
temerè ambiant, aut alienis consilijs in præ-  
ceps abripi sese sinant. *Anhaltinus* in Sueciam,  
alij alio se contulerunt.

PALATINO in Holladiam turpiter pro-

*Principes  
Vnionis  
cum Spi-  
nula tran-  
sunt.*

fugo, PRINCIPES VNIONIS, (vt vocabāt)  
EVANGĒLICAE à Marchione SPINVLA,  
qui VVormatiam obsidere parabat, sibi me-  
tuentes, mutatis in melius consilijs, de armjs  
ponendis cogitare cœperunt. IOANNE itaq;  
SVICHARDO, Electore Moguntino, & LV-  
DOVICO Habsiæ Lant-Graui Darmstadi-  
ensi, interuenientibus, IOACHIMVS ER-  
NESTVS, Marchio Brandenburgensis, cogno-  
mento *Anspacensis* (qui dictæ Vnionis exer-  
citui cum imperio præerat) & IOANNES  
FREDERICVS, Dux VVirtembergensis,  
cum Moguntiam venissent, tam suo quàm  
aliorum Principum ac Statuum Vnitorum  
nomine, cum SPINVLA, Capitaneo, vt lo-  
quuntur, generali, exercitus Cæsarei, in Pa-  
latinatu, his conditionibus die 12. Aprilis  
transfegerunt:

*Ante omnia conuenit inter prædictos Principes  
& Status, deinceps ab omni hostilitate penitus in-  
ter se abstinere, ita vt Principes & Status Vnio-  
nis, eorumque exercitus, nullatenus posthac D.  
Marchionem Spinulam, neque ipsius copias, aut  
loca, quæ in eius potestate nunc sunt, neque alios  
in hoc tractatu comprehensos, aut eorum terras  
& dominia offendant, neque Fredericum Pala-  
tinum pecunia, milite, vel alio quouis modo di-  
recte vel indirecte per se vel per alium iuuent; eo-  
rum antehac initam Vnionem, nec in fauorem  
Friderici Palatini, nec contra Cæsaream Ma-  
iesta-*

iestatem prorogent, aut nouam ineant, sed ante terminum Vnionis effluxum, scilicet 14. proximè instantis mensis Maij. copias suas, siue priuatas siue communes, ex Palatinatu & alijs ad defensionem Palatinatus vsurpatis locis educant, & discedere faciant, atque Cæsareæ Maiestatis fideles & obediētes Principes & Status permaneant: vt hac de re sapius apud Cæsaream Maiestatem contestati antehac sunt.

Vicissim D. Marchio Spinula nihil posthac hostile tentabit in DD. Vnitorum Principum, & Statuum personas, milites, Officiales, subditos, arces, ciuitates & terras, nec depredationibus, exactionibus, excursionibus, nec alio quouis modo.

Hoc autem tractatu comprehendentur, tam in concordia Vlmeni nominati, quā ceteri Electores, Principes, Status, & Nobiles Imperij siue Catholici siue Euāgelici, nō tamē intēdūt dicta partes de terris Iuliacēsis hoc loci quidquā disponere.

Quantum autem ad Fredericum Palatinum attinet, (quem ea, quæ hactenus dicta sunt, non attingunt) dictus D. Marchio Spinula, ad requisitionem Magnæ Britannię Regis, promisit ab hinc vsque ad supradictum terminum, 14. Maij in executione Palatinatus sibi commissæ, in personis & bonis, siue per se, siue per alium non progredi, sed eam executionem tantisper suspendere: hac tamen conditione, quod Principes Vnionis efficiēt, ne copia priuata præacti Palatini, iam in Palatinatu vel in vicinis locis existentes, interea vllam

*hostilitatem contra D. Marchionem Spinulam, eiusq; exercitum, & loca quæ obtinet, aliosq; fideles Imperij Status, eorumq; ministros, & subditos exerceant.*

*Et ne vicini Principes & Status, eorumq; subditi, aut alij in ipsorum territorijs, ab vnus aut alterius partis milite grauentur aut ledantur, promiserunt saepe nominati Principes vtriusq; exercitus, serio & certò efficere, vt omnes excursiones, depredationes, aut quauis aliæ infestationes in ipsorum terris & prouincijs prorsus inhibeantur & cessent, viarumq; & commerciorum securitas promoueat.*

*Ad quorum omnium maiorem firmitatem, hos articulos saepe nominati Principes vtriusque partis, vnà cum Principibus interuenientibus, suis sigillis, & subscriptionibus roborarunt : vtq; à S. Cæsarea Maiestate, & D. Archiduce Alberto confirmentur, D. Marchio Spinula quamprimum procurabit. Actum Moguntiae 12. Aprilis anno 1621. Et infra subsignauerant, AMBROSIVS SPINULA, IOANNES SVVICHARDVS Archiepiscopus Moguntinus, LVDOVICVS Lant-grauius Hassiæ, IOACHIMVS ERNESTVS Marchio Brandeburgensis, IOANNES FRIDERICVS Dux VVirtembergensis.*

*SPINULAM porrò, pacatis in Germania rebus, ad Belgas reducem, variij varijs Panegyricis, nos isto breui Elogio profecuti sumus.*

AMBRO-



*Marchio-  
nis Spinula  
elogium.*

AMBROSIVS SPINULA natus est Genuæ, patre PHILIPPO, nobilissimo Venetici Marchione, & matre POLYXENA GRIMALDA, Nicolai Principis Salernitani filia. Fratrem habuit FREDERICVM Spinulam, qui sub magno illo ALEXANDRO FARNESIO, Parmæ Placentiæque Duce, ordinis bello Gallico ductavit. Idem postea à PHILIPPO III. Hisp. Rege, validæ triremium classis cum Imperio præfectus, anno 1600. per medias Batauorû classes, vastumque Oceanum ex Hispania in Belgicam traiecit. At verò dum non modò cum hoste, sed cum bruto quoque illo elemento, triremium hic impatiente, Flandriam ac Zelandiam inter, conflictando, fortiter dimicat, plurimis hostium cæsis, & ipse, pro dolor, infausto maioris machinæ globo, ann. 1603, die 26. Maij saucius cecidit.

FREDERICI amissi dolorem mitigavit AMBROSII fratris ex Italia in Belgicam, cum amplissimis copijs, paulò post aduentus. Cuius quidem virtus eximia, diuinus generosi animi vigor, magna sollertis ingenij vis, summa in periculis adeundis audacia, promptum in iisdem depellendis consilium, indefessa bellicis in expeditionibus vigilatia, & mira in rebus omnibus industria, *Spinula* Ostendana in obsidione primùm emicuerunt. *Ostendam* Oppidum istud varijs magnisque molibus *expugnat.*

ac propugnaculis ( totidem insulis, diceres ) Bataui muniendo distinxerant. Nec illud Mars solùm, sed & Neptunus tuebatur, vastusq; Oceanus, ruptis immissus aggeribus, pro obsessis pugnabat, nostrosque arcebat. Obsidione itaque in triennium ductâ, cùm nec claudi nec cingi, adeoq; nec vinci, omnium iudicio, posset oppidum, vnus AMBROSIVS signum sustulit, & portu fascibus obstructo, ductis item cuniculis, hostibusq; profligatis, paucorum mensium spatio, Ostendam an. 1604. die 22. Septembris expugnauit.

*Antuerpiã  
seruat.*

Anno proximè insequenti, duce MAVRITIO NASOVIO, cùm Bataui aggerem VVasianum prope Antuerpiam perrumpere, & Antuerpiam ipsam obsidere tentarèt, tridui spatio, Scaldim fluuium ponte strauit, copijs nostris commodè vltro citroque traijciendis. Quo prudenti consilio, non Brabantiam modò, quam hostis spe deuorarat, sed & Flandriam ab omni metu liberauit, hostilesq; copias, multis priùs cæsis, vela ac tergum vertere coegit. Exinde Scipionem Africanum imitatus, vt ille in Africam, sic ipse in Frisiam ac Transrhenanas prouincias, totam belli molem traduxit, hostemq; nostris à iugulis reiectum, suo in solo cædi, vinciq; posse demonstraui. Fidem faciunt *Oldefalia, Linga, VVachtendunca,*

*Linga & a-  
lia oppida  
capit.*

*Craca-*

*Cracauia, Lochemium, Grolla, Rheinberca*, aliaq; oppida milite præfidiario, loci ingenio, atq; arte munitissima : quæ MAVRITIO cum exercitu inspectante, & nequidquam frendente, eodem ipso anno noster expugnauit, atque ad deditionem compulit.

Quid amplius? Copijs nostris hostili fraude ac seditione militari distractis, *Grollam* recens in deditionem acceptam, munitio- *Grollam*  
nibus nondum instauratis, Bataui obsident. *obsidione li-*  
*berat.*

SPINULA quid agit? Consilia mox expedit, generosum militem, in concionem vocatum, allocutione compellat, & per sæuas imbrium ventorumque tempestates, magno atque inuicto animo in hostem ducit, signa aquilasque fortiter promouet. Et ecce, panico velut terrore perculsus MAVRITIVS cum suis terga vertit, castrisq; exutus turpiter fugit, pudenda omne in æuum nota.

Inducijs stantibus, cū ORDINES BELGICI confœderati partes Marchionis BRANDEBURGICI potius quā Ducis NEOBURGICI, primò clanculum, dein apertè fouerent, & huius militem *Iuliaco* expulissent, *Dusseldorpium* (vbi tunc Neoburgici coniux agebat) frustra tentassent, tractatum Vefaliensẽ, (vbi de concordia vtrimque agi cæptum) re infecta interrupissent, aliaque multa more suo seditiosa molirentur, SPINULA à MATTHIA Cæsare, \  
ciusque

*Aquas-  
Grani &  
Vesaliam  
occupat.*

eiusque fratre ALBERTO, Belgarum Principe, supremus belli dux constitutus, anno 1614. exercitum, paci publicæ asserendæ, omnium opinione celerius conscripsit. AQUAS-GRANI itaque, urbem Imperialem, mandato eiusdem Cæsaris, primò aggreßus, eam paucas intra horas ad obedientiam compulit: mox *Vesaliam*, veterem Caluinianorum sentinam, & alteram quasi Geneuam, aliaque oppida Rheno adlita, magna celeritate ac felicitate occupauit.

Quapropter PHILIPPVS III. Rex Catholicus heroem fortissimum, optimè de Republica Christiana meritum, nobilissimo Equitû aurei Velleris collegio primùm, post Hispaniæ magnatibus (quos Grandes vulgò nūcupāt) iure meritissimo adscripsit.

Venio ad res nuper in Palatinatu præclare gestas. Bohemi rebelles, abdicato contra ius & fas FERDINANDO II. Austriaco, FREDERICVM Electorem & Comitem Palatinum Rheni ad regni coronam euocant. Pro Palatino stabant *Hassus, Anhaltinus, VVirtenbergensis, Anspacensis, Durlacensis*, & alij Protestantes Vnionis Euangelicæ (vt ipsi vocabant) Principes, itemque Ciuitates plûs minùs XVI. Imperiales. PHILIPPVS itaque Rex Catholicus, & ALBERTVS Belgicę Princeps, copiosissimum apud Belgas exercitum, ad inuadendum Palatinatum (dum

*Frede-*

*Fredericus* Prage frustra regnum firmare nititur ) viresque hostium distrahendas, conscribi iubent.

Cui quidem summo cum imperio præfectus *SPINVLAM*, anno 1620. exeunte, mense Augusto, in Palatinatum inferiorem irrupit, & paucos intra menses *Crucenacum*, *Oppenheimum*, *Baccheracum*, *Simmeracum*, *Trarbacum*, *Disibodimontem*, *Spanheimum*, aliaque oppida amplius quinquaginta, partim ad Rhenum, partim ad Mosellam sita, vix ullo suorum damno, occupavit. Et iam *VVormaria* (quæ confœderatorum Principum sedes erat) imminabat, cum *ANSPACENSIS*, & *VVIRTEMBERGENSIS*, grauiora metuentes, suo ac sociorum nomine, *Moguntiam* venire, & anno 1621. die 12. Aprilis, se suaque omnia Cæsari submisere.

*SPINVLAM* ad Belgas reducem *ALBERTVS* Archidux supremum aulae suæ Oeconomum renuntiavit: quæ dignitas in nostro & Hispaniensi palatio est omnium prima: ut & *PAVLVS V.* Papa eiusdem filium secundogenitum *AVGVSTINVM S.R.E.* Cardinalem trimestri antea nominarat. Reliqua victoriarum trophæa posterior dicet ætas.

Annus hic multis Principibus fatalis fuit. *PAVLVS V.* Papa, annos sexaginta octo, & menses quatuor natus, exeunte Ianuario moritur,

*Palatinatum innadit.*

*Paulus V. Papa moritur.*

moritur, LXXII. Cardinales viuos post se relinquens. Die 9. Februarij sufficitur GREGORIUS XV. Pontifex verè Optimus Maximus, patria Bononiensis, ex illustri Ludouifiorum familia.

*Philippus  
III. Rex  
Catholicus.*

PHILIPPVS III. Hispaniarum & Indiarum Rex Catholicus, die vltima mēsis Martij, relictis terræ regnis, ad æterna ac cœlestia, vt cōfidimus, euolauit. Fuit enim Princeps verè pius, clemens, pacificus ac bonus. Tres filios, ac totidem filias ex MARGARITA, Ferdinandi II. nunc Cæsaris sorore, sustulit. Ex his primogenitus PHILIPPVS DOMINICVS VICTOR CRVCIVS, anno 1605. die 8. Aprilis. feria 6. Parasceues, natus est Vallisoleti: qui nunc est PHILIPPVS IV. potentissimus Hispaniarum Indiarumque Monarcha: què vt Deus Opt. Max. diu sospitem seruet, ex animò rogamus. Seianis omnibus aula pulsus, habet is primarium sibi Consiliarium D. BALTHASAREM ZVNIGAM, virum legationibus, Belgica, Gallica, ac Germanica, itemq; rerum vsu clarissimum: quo nomine est quod non solum Belgicæ nostræ ac Germaniæ, sed vniuersæ Reipub. Christianæ gratulemur. CAROLVS genitus est Madriti, anno 1607. die 15. Septembris; FERDINANDVS autem S.R.E. Cardinalis, & Archiepiscopus Toletanus, in Scuriaco an. 1609. die 16. Maij. ANNA, nunc  
LVDOLV

LVDOVICI XIII. Francorū Regis vxor, nata est Vallisoleti, an. 1601. die 22. Septemb. hoc est, dieb. quinq; ante maritū: MARIA verò in Scuriaco, an. 1606. die 18. Augusti: MARGARITA aut Lermæ an. 1610. die 24. Maij.

COSMVS II. MEDICAEVS, Magnus Etruriæ Dux quartus mense Februario, moritur, ex *Maria Magdalena*, Ferdinadi II. Cæsaris sorore, relicto *Ferdinando* filio, Ducatus herede, & alijs aliquot liberis.

*Cosmus II.  
Dux Florentia.*

ALBERTVS, Austriæ Archidux, Burgundiæ Brabantiaëque Dux, Flandriæ Comes, & reliquarum prouinciarum Belgicarum Princeps laudatissimus, 13. die mensis Iulij, Bruxellis in Domino pijsimè, & animo quæ maximè tranquillo, obdormit. Morienti adfuere P. INICVS BRIZVELA, Doctor Theologus ex ordine Dominicanorum, qui à sacris illi Confessionibus erat, & P. DOMINICVS, Carmelita discalceatus, gente Aragonius, vitæ sanctimonia celebris, quem anno superiore prælio Pragensi intertuisse, & nostris animos ad victoriam obtinendam addidisse suprà commemorauimus. Sepeliri voluit in veste monastica ordinis Franciscani; corpusque suum deponi mandauit in choro V. Sacramenti Miraculosi Bruxellis, cui fuerat deuotissimus; maiorum suorum exemplo. Ceteras eius laudes peculiari Elogio profecuti sumus.

*Albertus  
Belgarum  
Princeps.*

CARO

*Carolus  
Comes  
Buquoinus.*

CAROLVS LONGEVALLIVS, Comes Buquoius, *Hercules Belgicus*, Cæsarei exercitus ductor, militia & victorijs clarissimus, annos circiter quinquaginta natus in obli-  
dione *Castelli noui*, quod est munitissimum Hungariæ superioris oppidum, die 10. mēsis Iulij, à suis turpiter desertus, tredecim vulneribus confossus, occiditur, magno Reipublicæ Christianæ damno. Vnicum reliquit filium ALBERTVM, annos quindecim natum.

BUQUOIO è viuis sublato, cæptam *Castelli noui* obsidionem nostri turpiter deseruerunt, tormentis sexdecim curulibus hosti relictis. *Tirnaviam* insuper, aliaque oppida per Buquoium recuperata Hungari Germanis paucos intra dies eripuerunt, & Vinnam vsque omnia ferro flammâq; vastarunt. Tanti cōstitit, vel vnum BUQUOIVM amisisse. Sed à tristibus ad lætiora, in Galliam transcamus.

Caluiniani, secta Regnis ac Principatibus infestissima, vt nullum in Ecclesia, sic nec in Republica caput ferre possunt. Ante decennium *Iarigius*, *Chefbobinus*, eiusque filius, sparsis in vulgus libellis, ad regimen oligarchicum, quod præ monarchico laudabant, *Pictones* sollicitarant: sed capti, iussu Regis, vt merebantur, suspendio vitam finierunt. Anno huius sæculi vicesimo primò, quo



quo ista commentabamur, *Rupellani*, *Hugonottorum* in Gallia antesignani, exemplo *Batauorum*, suaue iugum Regium excutere, nouamque in ipsis regni Galliae visceribus Rempublicam constituere moliebantur. Vt impium scelus auerteret & præoccuparet *L. VDOVICVS XIII.* Rex verè Christianissimus, mēse Maio exercitum instruxit, & *Angeliacum S. Ioannis, Neracum, Cleracum*, aliaq; oppida plurima ab Hugonottis infesta expugnauit; & ne in posterum rebellare possent, vtili sane consilio, muris ac mœnibus nudauit: *Rupellam* denique, ipsam rebellionis arcem, terra marique clausit. Enimuerò si vmquam aliàs, nunc profectò optimam is habet rem bene gerendi, regnumque sibi ac suis æternum firmandi occasionem; *Batauis* scilicet domi forisq; occupatis, Protestantibus *Germania*. Principibus per bella superiorum annorum penitus exhaustis, *Heluctijs* ac *Rhatis* inter se tumultuantibus, *Britanno* denique Puritanos (qui idem cum Hugonottis Gallicis, & Gomaristis Batauicis, de Regibus vniuersis aut tollendis, aut in ordinem redigendis, impiè sentiunt) auersante ac detestante.

*MATTHIA* Cæsare, & *FERDINANDO* Bohemorum Rege, *Viennæ* agentibus, *Carolus Gonzaga*, Dux *Niuernensis*, & alij septemdecim primariæ notæ heroes, in aula

F.

tunc

*Rex Gallia  
varia Hu-  
gonottorum  
oppida ex-  
pugnat.*

*Ordo Equi-  
tum mili-  
tia Chri-  
stiana*

*Confirma-  
tur à Gre-  
gorio XV.  
Papa.*

tunc Cæsarea versantes (quos inter Germani, Galli, Poloni, Hungari, Itali, aliarumq; nationum proceres fuere) Ordinem *Equitum militiæ Christianæ*, sub patrocinio SS. *Deiparæ, Michaelis & Francisci*, contra Turcas & alios nostræ Religionis hostes, ante biennium instituerant. Præclarum hoc institutū FERDINANDO tunc Imperatori, PHILIPPO Hispaniæ, LUDOVICO Galliæ, SIGISMUNDO Poloniæ, Regibus, ALBERTO Belgicæ Principi, MAXIMILIANO Bauariæ Duci, Ecclesiasticis S. R. I. Electoribus, alijsq; Principibus probari, GREGORIUS XV. Pontifex Maximus cum intellexisset, illud ipsum diplomate typis Romæ edito comprobavit.

Gregorius Papa XV. *ad futuram rei memoriam. Regimini militantis Ecclesiæ*, nullo licet merito nostro, diuina dispensatione præsidentes, votis illis, per quæ *militarium Ordinum*, ad fidei Catholica propagationem, & defensionem institutorum, propagationi consulitur, libèter annuimus, eaque fauoribus prosequimur oportunis. Supplicationibus itaque pro parte dilectorum filiorum, Superiorum Militiæ Christianæ, nobis per dilectum etiam filium, nobilem virum, Ioannem Vincentium, Comitem de Arco, vnum, ut ipse asserit, ex dictæ Militiæ Prioribus, ac eiusdem Militiæ Oratorem, Nobis super hoc humiliter porrectis inclinati, Superioribus prædictis, siue ab eis deputatis, ut habitum per dictæ Militiæ fratres gestari solitum personis, nostro & S. R. E.

temporali domino subditis, exhibere, seu exhiberi facere; eisdemque personis, ut sine ullo fidelitatis, subiectionis, vasallagij, & cuiuscunque obsequij, Nobis, & pro tempore existenti Romano Pontifici, ac Apostolica Sedis Legatis, & Officialibus quomodolibet debitorum praeiudicio, habitum praedictum suscipere liberè & licitè respectuè possint, & valeant (dummodo tamen personae praedictae, in earum & cuiuslibet illarum ad habitum praefatum admissionem, aut alias quandocunque iuramentum non praestent, quod potestati, aut superioritati, vel iurisdictioni, aut alij cuiuscunque iuri nostro & Sedis Apostolica quomodolibet aduersetur) Apostolica auctoritate, tenore praesentium, & licentia & facultatē cōcedimus, & impartimur. Nō obstantibus constitutionibus, & ordinationibus Apostolicis, ceterisque cōtrariis quibuscūq. Datū Romae apud S. Petrum sub annulo Piscatoris d. e. 10. Maij 1621. Pōtificatus nostri an. primo.

Ordinis porrò istius militaris insignie est Crux auro intertexta, Meliteni, si formam spectes, non absimilis, Despara, & S. Michaelis imaginibus condecorata. Vide plura in Originibus nostris Equestribus.

Exemplo ad omnem posteritatem statuendo, die 21. Iunij, Pragae publicè in foro de viginti septem rebellibus supplicium est sumptum: ex quibus viginti quatuor capite plexi, alij tres suspensi tuere praesentibus tribus Iudicibus seu Commissarijs

*Praga de  
rebellibus  
27. suppli-  
cium su-  
mitur.*

Imperialibus, Consulibus item Pragensibus, ac Senatu vniuerso. Ex primarijs erant isti: *Ioachimus Andreas*, Comes Slickensis. *Venceslaus Budeuitius*, Præses Appellationum, *Christophorus* Bohemicæ Cameræ Præses, *Dionysius Schermerus*, arcis Pragensis Præfectus, *Ioannes Iessenius*, gymnasij Carolini Professor (cui & lingua est amputata) & *Leander Ruppelius*, Consiliarius Heidelbergensis. Alij non pauci aut ad perpetuos carceres damnati, aut proscripti fuere. Talis nimirum solet esse fructus & exitus rebellionis.

Anni superioris autumnus Poloni admodum infaustus fuerat. Hos GRATIANVS, Valachiæ Moldaniæque Princeps, professione Christianus, in auxilium, contra Turcas ac Tartaros, euocarat. Prælio vno alteroue commisso, victoria penes SEANDERVM Bassam Turcicum, & GALGAM, Tartarorum Præcopelium Sulthanum, stetit. Periere bis mille quingenti circiter Poloni, atque inter eos flos nobilium procerum: periit & ipse GRATIANVS. Vt cladem atque iniuriam acceptam SIGISMUNDVS Poloniæ Rex vindicaret, legatos militum ad plerosque orbis Christiani Principes, qui suppetias aduersus communem hostem peterent. His impetratis, exercitum Poloni centum amplius millium conscripsere, & pri-

*Polonorum  
clades an.  
1620.*

primo vere in hostes duxere, Byzantio relicto, & ipse barbarorum Imperator OSMANES, cum trecentis Turcarum ac Tartarorum millibus, in campum prodijt. Nostri, etsi viribus impares, in vno alteroq; tamen prælio superiores mense Septembri exstiterunt. Cecidere ex hostibus centum circiter millia, & classe ingenti per Cosacos in Pontum Euxinum immissa, ipsa barbari Imperij sedes Constantinopolis tremuit.

*Victoria an.*

1621.

Fuerat annus superior tot hostiū in Germania clādibus inlignis, vt spes foret omnes breui oppressos iri. Sed annus hic proximè insecutus, nostrorum socordia seu nimia securitate (quæ quidem res sæpe spoliātem iam & exultātem euertit) spem in sollicitudinem vertit IOANNES GEORGIVS, ex Marchionum Brandeburgensium familia, cognomento *Iagerdorsius*, Frederici Exregis Vicarium sese gerens, vastata Morauia, cum exercitu in Hungariam ad GABOREM, victorijs, post cædem BVQVOII, insolescentem, mense Augusto penetrauit; iunctisq; copijs, Viennam vsque, more Turcico ac Tartarico (quorum & auxilia aderant) omnia sunt depopulati, Posoniumque copioso Hungarorum equitatu aucti obsederunt.

1621.

*Posonium  
obsidetur.*

ERNESTVS MANSFELDIUS, Petri Ernesti, Belgicæ quondam pro Rege Catholico Gubernatoris, filius nothus, ex Palati-

natu superiore veniens, Bauaris, Herbipolentibus Bambergensibus, Spirensibus Treuerensibus, Alsatijs, alijsq; populis pro Cæsare stantibus magna damna intulit.

HORATIVS VEIRIVS, Anglorum Colonellus, qui *Frederici* copijs in Palatinatu inferiore præerat, agrum ac diœcesis Spirensis cœnobia non pauca rapinis, cœdibus, ignibus, ferroque barbarum in morem vastauit.

*Thabor  
obsidetur.  
& capitur.*

His alijsque rebus confirmati THABORENSES (quod vnicum ferè in Bohemia oppidū, post Pragensem superioris anni victoriam, ad obsequium compellere nostri neglexerant) in rebellionem perstiterūt, à BALHAZARE MARADA, Hispano militia claro multis mensibus obsessi, qui demū 18. Nouembris eos ad deditiōem compulit.

*Posonij obsi-  
dio ioini-  
tur.*

Sed animos, hortante atque vrgente per litteras GREGORIO XV. Pontifice, nostri mox resumpserunt. Inter alios SVENDIVS, Baro Germanus, & CARACCIOLVS Neapolitanus, qui Belgicis, Italicis, alijsque copijs, pro Cæsare, Regis Catholici stipendio ac sumptu, militantibus præerat, mense Septembri ineunte, *Glaborem, Iagerdorfum, Turrianum, Budianum*, & alios Hungaros fortiter aggressi, eosdem à Posonio repulerunt.

MAXIMILIANVS Bauariæ Dux, legatum

tum suum *Tillium* contra Mansfeldium primo cum exercitu misit, post ipse in aciem progressus, *Ambergam*, *Camum*, & alia in Palatinatu superiore oppida omnia subegit, pulso inde Mansfeldio.

*Amberga  
& Camum  
capitur.*

GONSALVVS CORDVBENSIS, magni illius Ducis *Gonsalvi*, qui pulsus Gallis, regnum Neapolitanum Ferdinando Regi Catholico vindicauit, ab *Horatio Verrio*, Spirensis agri vastatione, & sacrorum in ea diœcesis violatione, irritatus, *Steinensem* arcem munitissimam, haut procul *VVormatia* sitam, insigni astu, nostratium militum opera, mense Augusto occupauit. Ponte sublicio deinde (qui connexis inter se nauibus *Oppenheimij* hætenus steterat) è regione eiusdē arcis, *Rheni* fluctibus imposito, cæsis fugatisq; hostibus, *Binsheimiū*, *Starquebergā*, *Heppenheimiū*, *VVinheimiū*, *Luttrā Casaream*, aliaque oppida & arces expugnauit.

*Arx item  
Steinensis.*

PHILIPPVS CHRISTOPHORVS SVTTERENVS, Antistes Spirensis in arce sua *Vdenhemienfi*, ad *Rheni* & *Saltzæ* confluentem (quam superioribus annis *Fredericus* Elector Palatinus, & *Georgius Fredericus* Durlacensis, alijque confœderati, deiectis munitionibus, vastarant) instauranda perstitit, eiusque tutelam *Eduardo Geraldino*, Hiberno, viro nobili ac forti commisit.

*Vdenhemium in-  
stauratur.*

Sub idem tempus lætus ex Hispania nun-

*Hispanorū  
victoria ad  
fretum Hercu-  
suleum.*

tius adfertur de duplici Batauorum classe, vna per *Lusitanos* in India Orientali, altera per *Castellanos* ad fretum Herculeum, mense Augusto, die S. Laurentio martyri sacra, duce *Frederico Toletō*, dissipata; multis nauibus partim captis, partim demersis aut exustis.

*Ad Mamora-  
ram.*

Haut minùs illustrem ex Mauris victoriam, mense Maio anni eiusdem, Hispani apud *Mamoram* retulerunt. In ora Africæ ad Oceani littus, & *Lissi* (hodie *Lucus* vocatur) fluminis ostium, iacet *Larachium*, vulgò *Larache*, arx munita & valida: à qua non procul

1578.

SEBASTIANVS Lusitaniæ Rex, anno superioris sæculi septuagesimo octauo, cum exitu periit. Hanc arcem *Muleius Xequus* Maurus pecunia corruptus nostris, anno 1610. die 20. Nouembris, dedidit. Prope eam latebra est, & æstuarium maris, receptus piratis Mauris ac Batauis, vnde vicina Hispaniæ littora infestabant, & in prætereuntes naues grassabantur. Loco & fluuio, qui illac in Oceanum decurrit, *Mamora* nomen. Eum PHILIPPVS III. Rex Catholicus, *Ludouico Fagiardo* cum classe misso, anno 1614. occupauit, arcemque à fundamentis ibidem ædificari, & valido præsidio muniri mandauit. Batauis porrò instigantibus, Maurorum quinquaginta ferè millia, ad arcem expugnandam hac æstate conuenerant, *Hamete Alaixa* ductore: sed *Christophori Lechuga*, qui præ-



præſidiarium militem regebat, & *Alfonſi Contrera*, Equitis Melitenſis, qui obſeſſis arma ac com meatũ ex Hiſpania aduexit, virtute repulſi ſunt. Periere ex hoſtibus illa obſidione ad xiv. millia.

Ordines porrò Belgici conſcœderati, vt aliquid agere viderentur, menſe Iunio, *Societatem India Occidentalis* publicarunt: Societatem dico ex ditiorum mercatorum numero conflata, qui priuatas opes ſuas velut ſym-bolas conferant, & cincta armis commercia ad antipodas & alio Sole calentes Indos nauigiis emittant. Sed iſtas ad populum phaleras, & vana puerorum terriculamenta iam dudum nouimus. Et habent profectò, vbi meliùs ac certiùs ſuas Bataui facultates collocent; alterius Societatis Indiçe exemplo ac ſucceſſu ſat edocti, quàm ſerò (aut nunquam) ad deducendas rationes ſeu com-putus veniatur.

Induciis duodecennialibus apud Belgas finitis, cùm Bataui, Zelandi, Friſii, aliique populi conſcœderati in rebellione perſiſterent, & priores armis agrum noſtrum infeſtaſſent, PHILIPPVS IV. Rex Catholicus ampliffimas copias in Germania, Lotharingia, Burgundia, Belgicisque prouinciis conſcribi iuſſit. Exercitu vnum in corpus conflato, SPINVLÀ Bruxellis die 18. Auguſti diſceſſit, & poſitis ad Veſaliam caſtris, *Henricum*

*Iuliacum  
obsidetur.*

Comitem Bergensem, veteranum militem ac ducem, cum parte exercitus, ad Iuliacum (quod *Mauritius Nassavius*, Gallicis ac Britannicis fretus auxilijs, pulso milite Cæsareo, an. 1610. expugnarat) obsidendum misit. Is arcem primò *Reidensem*, situ loci & arte munitissimam, haut procul inde sitam, in deditionem accepit; pòst Rura fluuio, qui oppidum alluit, alium in alueum deducto, valida xvii. propugnacula, ne quà elabi possent obsessi, circumcirca excitauit. Et ne *Mauritius*, qui castra ad Rhenum, Embriam inter & Ræsam, habebat, Iuliacensibus succurrere, aut commeatum inferre posset, SPINVLÀ ad Vesaliam cum exercitu constitit; & ne otiosus esset, vicina aliquot oppida ad obsequium compulit, & Vesalientibus in officio perpetuum continendis, arcem nouam, ad oppidi muros, à fundamentis exstruendam curauit.

Vt est frequentissimus, & Religionis auitæ studiosissimus populus Parisiensis, sic vltro ad arma contra Hugonottos facillimè concitatur. Testis Bartholomæi Apostoli festus dies, qui in prouerbium apud Gallos abiit, & xii. ampliùs millia, in tumultu populari, anno 1572. cæsa vidit. Sic illo ipso tempore, quo ista scribebamus, plebs Parisiensis, *Henrici Lotharingi*, Ducis Mainij, ad Montem Albanum, quem *LVDOVICVS* Rex

*Ducis Mainij mors, 16. Septemb.*

Rex obsidebat, miserando casu commota  
 atque exacerbata, *Charentonium* (vicus est  
 altero à Lutetia lapide, Caluinistarum ad  
 conciones habendas conuenticulis infamis)  
 facto armatorum globo, die 26. Septembris  
 euolauit, & incenso euersoque illic templo  
 impio, obuios Hugonottos læsit aut truci-  
 dauit; Duce Monbazonio, vrbis Guberna-  
 tore, vnà cum magistratu, frustra obsistente.  
 Perempti sunt in vniuersum ex utroque se-  
 xu circiter quadraginta: & plures haut du-  
 biè periissent, nisi Monbazonius, & Senatus  
 plebem tumultuantem compescuissent, vi-  
 gilijs ad singulos vrbis vicos ac portas col-  
 locatis. Ne porro ferocientis plebis furor ad  
 plures transfiret, nonnulli ex tumultuanti-  
 bus, qui suburbanas ad S. Marcellum ædes  
 Hugonottorum spoliare conati fuerant, ius-  
 su Senatus apprehensi, laqueo vitam finie-  
 runt.

*Hugonotto-  
 rum cades  
 Charento-  
 nij.*



# BOHEMIAE REGVM PRIN- CIPVMQVE SE- RIES,

*Ex qua liquet, Bohemiae regnum, iam inde à pri-  
mis initijs ad nostra vsq; tempora, non ele-  
ctiuum, sed iure sanguinis here-  
ditarium fuisse.*

**C***zechus, gentis & principatus Bohemiae  
conditor, sine liberis obiit.*

*Crocus anno Christi 670. regnare cœpit.*

*Libussa, Croci filia, an. 710. præstigijs infamis.*

*Premislaus, Libussæ maritus, an. 722. ex quo  
coniugio deinceps propagati sunt Bohe-  
miæ Principes.*

*Nesamislius, Premislai & Libussæ filius, an.  
745.*

*Mnatha, Nesamislij filius, an. 783.*

*Nogenus, Mnathæ filius, an. 804.*

*Cresomislius, Nogeni filius, an. 831.*

*Neclanus, Cresomislij filius, an. 852.*

*Hostiuitus, Neclani filius, an. 873.*

*Boruius, Hostiuiti filius, primus Princeps  
Christianus an. 871.*

*Spitigneus, Boruij filius, an. 905.*

*Vra-*

*Vratislaus I.* Spitignei frater, an. 907.

*S. Venceslaus*, Vratislai I. filius, an. 921. qui  
Regis titulo per Othonem Imp. delato,  
vti noluit.

*Boleslaus*, cognomento *Sauus*, Venceslai  
frater, an. 919.

*Boleslaus Pius*, Boleslai filius, an. 967.

*Boleslaus III.* Boleslai filius, an. 999.

*Iaromirius*, Boleslai III. filius, an. 1003.

*Valdricus I.* Iaromirij filius, an. 1004.

*Bretislaus I.* Valdrici I. filius, an. 1043.

*Spitigneus*, Bretislai I. filius, an. 1055.

*Vratislaus II.* Spitignei frater, an. 1601. qui ab  
*Henrico IV.* Imp. creatus Rex; ipso facto  
primus se Regem gessit: et si postea ad an-  
nos. 60. titulus is fuerit interruptus.

*Conradus I.* Bretislai frater an. 1093.

*Bretislaus II.* Vratislai II. Regis filius, an.  
1093.

*Borinorius II.* Bretislai II. frater, an. 1100.

*Suatoplucus*, ex Othone Bretislai I. filio na-  
tus, an. 1107.

*Vladislaus I.* Vratislai II. Regis filius, an.  
1109.

*Sobieslaus*, Vladislai I. frater natu minor, an.  
1125.

*Vladislaus II.* Vladislai I. filius, an. 1140. qui à  
*Frederico Barbarossa* Imp. creatus est Rex  
II. Bohemiæ. Sed post ipsum denuo Re-  
gni titulus est suppressus.

*Frede-*

*Fredericus*, Vladislai II. filius, an. 1173.

*Vdalricus* II. Sobieslai I. filius, & Vratislai Regis nepos, an. 1174.

*Sobieslaus* II. Vdalrici II. frater natu maior, cedente fratre, anno eodem Princeps est factus. Sed hūc restitutus *Fredericus* throno deiecit. Frederico defuncto successit *Conradus* II. Leopoldi Znoimensis filius an. 1182.

Quo peste extincto.

*VVenceslaus* II. Othonis Nigri filius an. 1191. de Principatu cū *Premislao*, Vratislai Regis filio, contendit. Sed interfecto *VVenceslao*, & excluso *Premislao*, successit.

*Henricus*, Vladislai I. filius, ex Episcopo Pragensi factus Princeps, an. 1191.

*Vladislaus* III. Vladislai II. filius natu minor, an. 1197.

*Premislaus*, dictus *Othocarus*, Vladislai III. filius natu maior, an. 1197. cedente fratre, fit Princeps: qui à *Philippo* Imp. coronatus est Moguntiae Rex III. Bohemiae. Ex quo tempore Regius titulus est continuatus.

*VVenceslaus* III. cognomēto *Othocarus*, Premislai filius, Rex IV. Bohemiae, an. 1231.

*Othocarus*, aliàs *Premislaus Othocarus*, Rex V. Bohemiae an. 1254. quem bello vicit *Rudolphus* I. Imperator.

*VVenceslaus* IV. Rex VI. Bohemiae an. 1284. qui

qui ex *Iuditha*, Rudolphi I. Imp. filia, suscepit filium *VVenceslaum* cognomento *Iuniorem*, & filias duas *Annam* & *Elisabetham*.

*VVenceslaus V.* cognomento *Iunior*, patri suo successit, & fuit ultimus Bohemiæ Princeps ex virili posteritate Premislai Primi. Sororio itaque suo in regni hereditate successit,

*Henricus Carinthiæ Princeps*, qui *Annam VVenceslai I V.* filiam duxerat uxorem. Hic postea, quòd ab *Henrico I V. Luceburgico* confirmationem tempore debito (is scilicet prætextus fuit) non petisset, regno exutus est, & succenturiatus

*Ioannes*, Henrici I V. Cæsaris filius, ducta *Elisabetha*, *VVenceslai I V.* Regis filia natus minore. Ex quo coniugio prodijt

*Carolus I V.* Imperator & Rex Bohemiæ.

*VVenceslaus V I.* Caroli I V. filius.

*Sigismundus*, *VVenceslai VI.* filius, Rex Bohemiæ & Hungariæ, idemque Romanorum Imperator, verè pius, & Reipublicæ Christianæ salutaris, vnicam reliquit filiam *Elisabetham*, *Alberto II.* Austriæ Archiduci nuptam.

*Albertus Austriacus*, Sigismundi gener heresque regnorum, ac demum Imperator.

*Ladislaus*, Alberti filius & heres obiit sine prole. Habuit autem *Ladislaus* sorores duas,

*Annam*

*Annam & Elisabetham*, quarum maior *Guilielmo* Saxoniae Duci, minor *Casimiro* Poloniae Regi, ex Iagellonica familia, nupserrat. Sed vtraque contra ius & fas exclusâ, *Georgius Podiebradus*, Hufsitæ, per tumultum, & vehementem *Ioannis Roquesani*, Hufsitæ Ministri, orationem est intrusus: quem tamen nec Moravi, nec Silesij vquam pro Rege agnouerunt. Eo defuncto,

*Vladislaus*, Casimiri filius, ex *Elisabetha* iuniore Ladislai sorore, in regno Bohemiae successit, idemque Rex Hungariae fuit.

*Ludouicus*, Vladislai filius, Bohemiae Hungariaeque Rex, à *Solimanno*, Turcarum Imperatore, ingenti prælio victus ac caesus obiit improlis. Eius locum excepit.

*Ferdinandus Austriacus*, Caroli V. Cæsaris frater, qui *Annam* Ludouici sororem sibi matrimonio iunxerat, post Imperator.

*Maximilianus II.* Imperator, idemque Rex Bohemiae & Hungariae, Ferdinandi filius.

*Rudolphus II.* Maximiliani II. filius.

*Matthias*, Rudolphi II. frater, anno 1619. sine prole obiit. Patrueli suo successit

*Ferdinandus II. Austriacus*, Imperator, Caroli Archiducis, Stiriaeque Ducis, ex Maria Bauara, filius.

Ex ista Bohemiae Regum Principumque  
serio



serie datur intelligi, ab vnoquoque Príncipe proximum filium, filiam, vel fratrem fuisse regni heredem nuncupatum, vt fit in hereditaria successione. Ipsa item dissidia, ac mutuae inter cognatos de Regno contentiones, certo argumento sunt Principatum iam inde ab initio fuisse hereditarium; quòd eum quisque tamquam sibi debitum, non suffragio electionis, sed praeuogatiua successione vindicaret.

Porro ex ipso CAROLI IV. Cæsaris diplomate disertissimè constat, non competere Bohemis ius Electionis, nisi prorsus nullo ex regali Bohemiae prosapia, seu masculo seu foemina, superstitite. Verba diplomatris sunt ista: *Electiorem Regis Bohemiae, in casu dumtaxat & euentu, quibus de genealogia, progenie, vel semine, aut prosapia regali Bohemiae masculus, vel foemella superstes legitimus (q̃ Deus auertat) nullus fuerit oriundus, vel per quemcumq̃, alium modum vacare contigerit dictum regnũ, ad Pralatos, Duces, Principes, Barones, Nobiles & Communitatem Regni praefati & pertinentiarum eiusdem, decernimus, pronuntiamus, interpretamur, & praesentis scripti patrociniò declaramus, ritè iuste & legitimè in perpetuum pertinere.*

Idem CAROLVS IV. in Bulla Imperij aurea cum declarasset, Electoratus omnes esse hereditarios, atque inter alios etiam Bohemicum; id tamen amplius Bohemiae concessit

cessit, vt deficiente herede, Regnum nō deuoluatur ad ius Imperij, sicut reliqui Electorum Principatus, sed Ordines siue Status, in euentu istiusmodi, Regem sibi eligant, qui à Cæsare tamē confirmari & inuestiri debeat.

Aduersus hæc & alia Bohemi rebelles vnicum *Georgium Podiebradium* obrudebant, in quo à *CAROLI IV.* decreto est discessum. Sed, vt supra in Regum Serie docui, quidquid tunc tumultuariè peccatum, paulò post correctum fuit; *VLADISLAV* ad regnum vocato, qui ex sorore *Ladulas* Bohemiæ Regis natus erat. Vt omittam, anno millesimo quingentesimo quadregesimo septimo, sub *FERDINANDO I.* Rege, in publicis Ordinum regni comitijs, constitutum fuisse, vt iuxta *Caroli IV.* diploma, & *Vladislat* vltimi dispositionem, eiuldemque *Ferdinandi I.* litteras Reuersales, an. 1545. datas, in Rege subrogâdo deinceps procedatur. Quod quidem Ordinum decretum inter regni leges, quas Constitutiones vocant, est adscriptum, & postea diligenter obseruatum. In istis autem *Ferdinandi I.* Reuersalibus expressè sic legitur: *Cōstitutiones Caroli IV. Imperatoris hoc in se continet & cōprehendunt: Si ex Regia prosapia & stemate, masculiei & feminei sexus, legitime procreatis, nemo superstes esset, libera electio Regi Bohemiæ Statibus eiusdem regni, & prouincijs ad illud pertinentibus non aliter competeret.*

FINIS.

# INDEX RERVM.

- A**LBERTVS Belgarum Princeps respuit Imperium. pag. 17  
 Copias in Bohemiam mittit, & moritur. 25. 79  
 Anhaltinus Princeps. 24 44  
 Arminianorum factio in Hollandia. 26  
 Austriaca domus Romanorum Impp. parens ac nutrix. 25
- B.**
- B**Althasar Zuniga Philippo IV. Regi Catholico à cōsilijs 87  
 Bannum Imperiale cōtra Fredericum Palatinum, eiusque  
 affeclas. 68  
 Barneuelcius capitur, 28. decapitatur. 30  
 Berlenus Gabor Transiluaniam occupat. 59  
 Cum Palatino Comite conspirat, & Cassouiam capit. 60  
 Rex Hungariæ eligitur, Lippam & alias arces Turcis tra-  
dit. 65  
 Presburgum occupat & Castellum nouum obsidet. 68  
 Presburgum à Buquoio recuperatū frustra obsidet. 85. & 86  
 Bohemorum rebellio, Matthia Comite Turriano auctore. 15  
 Bohemiæ Regum series, ex qua Ferdinandi II. ius heredita-  
 rium, & legitimam in regno Bohemiæ successionem licet  
 agnoscere. 92. & seqq.  
 Buquoius Comes in Bohemiam mittitur, & Mansfeldium cæ-  
 dit. 25. & 26  
 Bohemiam cum Bauaro intrat. 1 37  
 Læditur ad Raconitium. 41  
 Pragam intrat, post victoriam adeptam. 46  
 A Paulo V. Papa per literas laudatur. 52. Morauiam subigit.  
 56  
 Cæsari vexilla 160. offert. 67. Occiditur in obsidione Castelli  
 noui. 80
- C.**
- C**Æsares XII. Austriaci laudantur. 17  
 Carolus Gonzaga Dux Niuernensis. 81  
 Carolus Liechtensteinus occupat Carlostonium. 47
- G 2**
- Come-

# I N D E X.

Cometa, anno 1619. visus, quæ nuntiavit.	29. & 46
<u>Cosmus</u> Medicus Florentiæ Dux suppetias Cæsari mittit.	25
Moritur.	79
<b>D.</b>	
<b>D</b> Ampetræ Comitis mors ad Posonium.	40
Defensionis Christianæ Sodalitas instituitur.	57
P. Dominicus, ex ordine Discalceatorum, in prælio Pragensi nostros hortatur ad pugnam.	43
Alberto Belgarum Principi morienti adest.	79
Dordracena Pseudo-Synodus in Hollandia.	29
<b>E.</b>	
<b>E</b> quitum militiæ Christianæ Ordo instituitur.	82
<b>F.</b>	
<b>F</b> erdinandus II. fit Cæsar.	22
Bannum Imperiale contra Palatinum & alios publicat.	68
Franciscus Gomarus, Professor Leidensis, nunc Groningensis in Frisia.	26
Fredericus, Comes Palatinus Rheni, à rebellibus eligitur Rex Bohemiæ.	24
Fugit Praga.	45
In Hollandiam se confert.	69
Fredericus Spinula, Ambrosij frater, prope Slusam in Flandria occumbit.	73
<b>G.</b>	
<b>G</b> abriel Bathorius per Gaborem priuatur Principatu Transilvaniæ & vita.	59
Galga Tartarorum Sultanus vincit Polonos.	84
Gaucherius Equitum Colonellus laudatur.	42
Gomaristarum seu Contra - Remonstrantium factio in Hollandia.	62
Gonsalvus Cordubensis varia oppida in Palatinatu inferiore occupat.	87
Gratianus, Valachiæ Moldaviæq; Princeps, occumbit in bello contra Turcas.	84
Gregorius XV. fit Papa.	78
Confirmat ordinem Equitum militiæ Christianæ.	82
Gro-	

# I N D E X.

Grotius capitur 28. cista effertur è carcere. 39

H.

**H**assia Lantgravius Mauritius stat pro Palatino. 24

Henricus Comes Bergensis obsidet Iuliacum. 90

Henricus Matthias, Comes Turrrianus, auctor rebellionis Bohemorum. 16

In Silesiam fugit. 45

Presburgum cum Gabore frustra obsidet. 35

Herbipoli comitia celebrantur. 32

Hispanorum victoria naualis ad fretum Herculeum, & altera ad Mamoram. 88

Hugonottorum cædes apud Charentonium. 91

Hungarorum rebellio, per Gaborem procurata, fusè describitur. 58. & seqq.

L.

**I**acobus Arminius, Professor Leidenfis, à quibus dicti Arminiani. 26

Iagerdorffius, Palatini Exregis Vicarius, iungit se Gabori. 85

Indica mercatorum Societas apud Batauos. 89

Ioannis Godefridi, Herbipolensis ac Bambergensis Episcopi laus. 41

Ioannes Malderus, Episcopus Antuerpiensis, Pseudo-Synodum Dordracenam refutat. 30

Ioannis Ziechtenbergij Prognosticon. 53

Ioannes Suichardus, Archiepiscopus Moguntinus, familiæ Austriacæ addictus. 17

Pacis arbiter inter Spinulam & Principes confœderatos. 70

Iuliacum obsidetur ab Henrico Comite Bergensi. 90

Excipitur in tractatu Moguntino. 72

L.

**L**Edenbergij cadauer suspenditur. 30

Ludouicus XIII. Rex Gallia in Bearnia Hugonottos domat. 56

Angeliacum S. Ioannis, & alia Hugonottorum oppida expugnat. 81

Montem Albanum obsidet. 90

G 3

Ludouicus,

# I N D E X.

Ludouicus Darmstadiensis, Lantgravius Hassiæ, Cæsari fidus, comitijs interest Mulhusiæ.	32
Moguntino item conuentui.	70
<b>M</b> ainij Ducis mors, ad Montem Albanum.	90
Mansfeldius à Buquoio cæditur.	26
Nostros ad Pilsnam deludit.	39
Ex superiore Palatinatu vicinos infestat.	86
Matthias Imperator moritur Viennæ.	17
Mauritius Nassavius, Princeps Arausionensis, Arminianis infestus.	28
Fredericum Comitem Palatinum, nepotem suum, ad se venientem Hagæ excipit.	69
Grollæ obsidionem deserit, veniente Spinula.	75
Castra inter Embricam & Raxam habet.	90
Maximilianus, Bauariæ Dux, Cæsari fidus.	24
Austriam superiorem subigit.	33
Bohemiâ intrat.	37
Pragam ingreditur, post victoriam adeptam.	47
Ad Paulum V. Papam literas scribit.	47
Praga discedit.	53
Ambergam, Camum, & alia oppida in Palatinatu superiore occupat.	87
Moguntina pax inter Spinulam & Principes protestantes unitos.	70
Mons Albanus obsidetur à Ludouico Rege Galliæ.	90
Paulus V. Papa indicit <u>decimas, 10. Moritur.</u>	77
Petersemij Baronis laus.	42
Petrus Bertius ex Arminiano fit Catholicus Parisijs.	29
Philippus III. Rex Catholicus Ferdinando Cæsari succurrit.	25
Moritur.	78
Philippus IV. Rex Catholicus patri succedit.	78
Polonorum clades, & post victoriâ cœtra Turcas ac Tartaros.	84
Pragense prælium fusè describitur.	44. & seqq.
Praga deditur Bauaro & Buquoio.	45
Presburgum Gabor occupat.	63
Buquoius recuperat.	68
	Gabor

# I N D E X.

Gabor frustra obsidet.

15

R.

Rvdolphi I. Imperatoris pietas erga V. Sacramentum. 18

Rudolphus Planta Vallem Musteliam occupat. 37

Rupella obsidetur, iussu Ludouici Regis Gallia. 81

S.

Saxo Elector Caesari fidus. 25

Mulhusensibus comitijs interest. 32

In Lusatiam irrupit, & Silesios ad obedientiam compellit.

37

Sigismundus, Poloniae Rex, Caesari suppetias mittit. 25

Vincit Turcas ac Tartaros ad Danubium & Borysthenem.

85

Spinula Ostendam expugnat. 73

Grollam obsidione liberat, Lingam, Aquasgrani & Velsa-  
liam occupat. 74

Palatinum inuadit. 37

Cum Principibus Vnionis transigit Moguntia. 70

Iuliacum obsidet per Henricum Comitem Bergensem. 90

Steinensis arx in Palatinatu inferiore occupatur à nostris. 87

T.

Thabor oppidum Bohemiae obsidetur & capitur. 86

Tirnauia recuperatur per Buquoium. 68

Iterum à Gabore occupatur. 80

Turrianus Comes. Vide, Henricus Matthias.

V.

Vallis-Tellinae defectio à Grisonibus. 34

Vdenhemium, arx Episcopi Spirensis, instauratur. 87

Vlmensis pax inter Bauarum & Principes Vnionis. 33

Vnio, vt vocabant, Euangelica Principum Protestantium, an.

1608. incohata, exstinguitur an. 1621. 68

VV.

VV Irtenbergensis Dux Frederici Palatini partibus ad-  
haeret. 14

Transigit cum Spinula Moguntia. 70

APPRO

## APPROBATIO.

**H**IC Commentarius R. D. AV-  
BERTI MIRÆI, S. Th. Licentia-  
ti, & Canonici Antuerpiensis, *De bello*  
*Bohemico sub Ferdinando II. Romanorum Im-*  
*peratore*, quia & veritatis enarratione &  
stili elegantia eximius, meritò typis  
mandabitur. Datum Bruxellis 27. Au-  
gusti 1621.

*Henricus Smeyers, Scholasticus Brux.*  
*& librorum Censor.*

---

## APPROBATIO.

**C**OMMENTARIUS hic de bello Bo-  
hemico FERDINANDI II.  
Cælaris auspicijs feliciter gesto, Au-  
thore Auberto Miræo; nihil continet  
fidei Catholicæ, aut morum honestati  
contrarium; dignum itaq; prælo cen-  
seo. Scriptum Colonia 18. Ianuarij.  
M.DC.XXII.

*Henr. Francken Sierstorpffius SS. Th. D.*  
*Gymn. Laurentiani Regens,*  
*Librorum Censor.*